

Ekwo Ndu-ikpe

Ndu Ízurelu etso ndu Kénanu ophu phoduru nu ogu

¹ Jioshuwa nwuhuchaepfo; ndu Ízurelu bya akpata Chipfu ishi sụ iya: “?Bụ onye e-vuru ụzo je etsooru anyi ndu Kénanu ogu?”

² Chipfu sụ phẹ: “Oo ndu Jiuda bẹ e-je nụ; mu wowaru ali ono ye phẹ l'eka.”

³ Tọbudu iya bụ; ndu Jiuda bya asụ ndu kẹ Simiyonu, bụ unwune phẹ: “Unu bya g'anyi tuko je l'ali ono, a nuru anyi ono je etsoo ndu Kénanu ogu. E -mechaa anyi ee-tsoru unu jee ogu k'unu.” Oo ya bụ; ndu Simiyonu tsoru phẹ jeshia. ⁴ No iya; ndu Jiuda jenụ etsoo phẹ ogu ono. Chipfu woru ndu Kénanu waa ndu Pérezu ye phẹ l'eka; ephe gbua ukporo unu nemadzụ l'unu ise lẹ mkpukpu Bẹzeku. ⁵ O bụru lẹ mkpukpu Bẹzeku ono bẹ ephe humaru Adoni-Bẹzeku; bya etsokwaa ya pho ogu. O bụru iya bụ l'ephe alwu-kpee ndu Kénanu waa ndu Pérezu. ⁶ Adoni-Bẹzeku ye okpa l'oso. Ephe chia ya gude; bushia ya mkpushi-eka ezekeka waa mkpushi-okpa ezekokpa. ⁷ No iya; Adoni-Bẹzeku sụ: “Ukporo ndu eze eto lẹ ndu eze iri, e bushiru ezekeka me ezekokpa shi atutuje ekputara lẹ mkpula teburu mu. Nta-a bẹ Chileke pfuwaru mu ugwo iphe, mu meru phẹ.” Ephe

kpuru iya jeshia Jierúsalemu; ọ buru l'eka ono be o mechaaru nodu nwuhu.

⁸ Ndu Jiuda tsokwaapho mkpukpu Jierúsalemu ogu; lwuta iya. Ephe gude oguechi gbufu mkpukpu ono; tufu iya oku. ⁹ E mecha; ndu Jiuda jepfushia ndu Kénanu ogu; mbu ndu Kénanu ophu bu l'alì úbvú úbvú; me l'echiegu ndohali; me l'alì okpa úbvú, no l'uzo enyanwu-ariba.

*Ọtuniyelu alwuta mkpukpu Debi
(Jios 15:13-19)*

¹⁰ Ndu ke Jiuda ono bya ejekwapho je etsoo ndu Kénanu ophu bu le mkpukpu Heburonu ogu; lwuta ndu Sheshayi; me ndu Ahimanu; waa ndu Talumayi. Iphe, e shi ekuje Heburonu le mbu bu Kiriyatu-Araba. ¹¹ Ephe gbẹ l'eka ono wuru jeshia ndu mkpukpu Debi ogu. Iphe, e shi ekuje Debi bu Kiriyatu-Sefa. ¹² No iya; Kalebu su: "Onye gbeshikpowaru je etsoo ndu Kiriyatu-Sefa ogu; lwua phe lwuta; mu e-ke onye obu nwatibe mu, bu Akusa g'ọ luru." ¹³ Ọtuniyelu nwa Kenazu, nwune Kalebu ke nwata tugbua je alwuta mkpukpu ono. Oo ya bu; Kalebu kee ya nwada iya ono, bu Akusa; o luru.

¹⁴ O lwaepho ibe Ọtuniyelu; o su iya g'o je epfuaru nna iya, bu Kalebu g'ọ wee ya ali.

Akusa bya enyizeta l'eli nkapfu-igara iya; Kalebu jia ya su: "?Bu gunu be mu e-meru ngu?"

¹⁵ O su iya: "Menaaru mu iphe-oma. Eshinu i suru ge mu laa echiegu ndohali; nufunaa mu ali l'eka mini, anwu shokoshoko." Oo ya bu; Kalebu bya eworu eka mini anwu shokoshoko

l'ẹka dụ dagere-dagere mẹ l'ẹka bú ọhu alì woru nù iya.

¹⁶ Oshilọkpa ọgo Mosisu, bú iya bú ndu Kénu bẹ yẹe ndu Jiuda shi lẹ mkpụkpu Jieriko, bú iya bú ndu Ọha-mpfụ tuko wufu jeshia echiegu ndu Jiuda, bú iya bú ẹka ono, nọ l'echiegu ndohali lẹ mgboru mkpụkpu Aradu. Ọo ya bú; ẹphe tuko buru l'ẹka ono. ¹⁷ Tọbudu iya bú; ndu Jiuda mẹ ndu Simiyonu, bú unwunna pẹ tughabe nanu je etsoo ndu Kénanu ọphu bu lẹ mkpụkpu Zefatu ọgu; mekọta mkpụkpu ono l'ọphu; ọ chihu. Ọo ya bú e kuahaa mkpụkpu ono Homa, bú iya bú “mkpurupyata”. ¹⁸ Ndu Jiuda lwutakwarupho alì Gaza; mẹ alì Ashikelonu; mẹ alì Ẹkuronu; lwutakota mkpụkpu, nọkota iya nù. ¹⁹ Chipfu nọ swiru ndu Jiuda; ẹphe lwuta ndu bu l'ẹka dụ úbvú úbvú. Ndu ọphu bu lẹ nsuda bẹ kpọbaru pẹ achishi kele ndu k'ono bẹ nweru ugbo-inya ọgu, e gude igwè mee. ²⁰ Mkpụkpu Hẹburonu bẹ a nuru Kalẹbu; kele Mosisu kwehawaru iya ukwe iya. Kalẹbu bya achishia unwu Anaku ẹto, bu l'ẹka ono. ²¹ Ndu Benjaminu bẹ ta achifuduru ndu Jiebusu, bu lẹ Jierúsalemu. Ndu Benjaminu yẹe ndu Jiebusu tuko buru ẹghirigha lẹ Jierúsalemu byasụ ntanu-a.

²² Ndu onu-ulo kẹ Jiósefu bẹ jekwarupho etsoo mkpụkpu Bẹtelu ọgu; Chipfu swikporu pẹ eswiru. ²³ Ẹphe bya ezia ndu e-je anwua ngge lẹ Bẹtelu ono, bú iphe, o shi aza bú Luzu. ²⁴ Ndu ono huma nwoke, shi lẹ mkpụkpu ono alufuta. Ẹphe sụ iya: “Jiko goshinu anyi onu-abata mkpụkpu-a. Anyi e-mekwaru ngu-a iphe-oma.”

²⁵ Oo ya bu; o goshi phe onu-abata mkpukpu ono. Ephe tsoo ndu mkpukpu ono ogu; gude ogu-echi gbushikota phe. Ole ephe haru nwoke ono; waa ndibe iya l'ophu. ²⁶ Tɔbudu iya bu; nwoke ono kwafu lashia ali ndu Hetu, bu eka o buwaro jaa buru mkpukpu eka iya. O gube mkpukpu ono Luzu, bu iya bu iphe, oza byasu ntanu-a.

Oha, ndu Izurelu ta achifuduru

²⁷ Ndu Manase be ta achifuduru ndu ali Betu-Shanu waa mkpukpu iya; me ndu ali Tanaku; me ndu ali Doru; me ndu ali Ibulamu; me ndu ali Megido; me mkpukpu le mkpukpu, nogbaa phe nu; kele ndu Kenanu ono be kporu ishi phe ye l'ali ono. ²⁸ A nonyaa; ndu Izurelu bya enweru agburehu; ephe kebuta ndu Kenanu; ephe jeahaaru phe ozi; kele ephe ta achifugbuduru ndu Kenanu ono.

²⁹ Ndu Ifuremu be ta achifukwarupho ndu Kenanu ndu ophu bu le mkpukpu Geza; ephe l'ephe toko bua eghirigha l'eka ono.

³⁰ Ndu ke Zebulun be ta achifuduru ndu ophu bu le mkpukpu Kitoronu; me ndu ophu bu le mkpukpu Nahalolu. Ndu Kenanu ono, bu l'echilabo phe ono; jeahaaru phe ozi.

³¹ Ndu ke Asha be ta achifuduru ndu bu le mkpukpu Ako; me ndu ophu bu le mkpukpu Sayidonu; me ndu mkpukpu Ahulabu; me ndu mkpukpu Akuzibu; me ndu mkpukpu Heluba; me ndu mkpukpu Afeku; me ndu mkpukpu Rehobu. ³² Oo ya bu; ndu Asha buru l'echilabo

ndu Kénanu, bu ndu vuhawaa ụzo buru l'alị ono; kele ndu Asha bẹ ta achifuduru phe.

³³ Ndu Nafutali bẹ ta achifuduru ndu bu le mkpukpu Betu-Shemeshi; waa ndu bu le mkpukpu Betu-Anatu. Ephe buru l'echilabo ndu Kénanu, bu ndu vuhawa ụzo buru l'alị ono. Ephe mee ndu Betu-Shemeshi; waa ndu Betu-Anatu; ephe jeahaaru phe ozi.

³⁴ Ndu Amoru bẹ nwularu ndu Danu azu; chiru phe ye l'alị úbvú úbvú. Ophu ephe te ekwedu g'ephe wu-pfuta phe le nsuda. ³⁵ Oo ya bu; ndu Amoru kebe l'ephe bufutaje l'úbvú Heresu; me le mkpukpu Ajialonu; me le mkpukpu Shalubimu. A nonya ndu onu-ulo Jiófefu bya aja àjàjà ka l'otu; bya aka enweru okpehu; ephe kebuta ndu Amoru ephe jeahaaru phe ozi mkponwu-ehu.

³⁶ Oke-alị ndu Amoru bẹ shi l'uzo isheli úbvú "Akpi" nọo jasụ le mkpukpu Sela; bya akwasewaruro ya.

2

Aabarụ ndu Ízurelu mba

¹ Ojosi-imigwe, shi l'eka Chipfu bya agbe le mkpukpu Gilugalu jeshia le mkpukpu Bokimu je asu: "Mu dufutaru unube ndu Ízurelu l'alị Ijiputu; duru unu ye l'alị ono, mu riburu nte le mu a-nu nna unu ono. Mu sụ le mu ta abyadu emebyi ogbandzu, mu le unu gbaru. ² L'unubedua bẹ bu iphe, duru unu bu g'unu le ndu bu l'alị-a ta gbashi ndzụ; unu echikposhikota oru-ngweja phe. Obenu l'unu jikaru eme iphe ono, mu pfuru unu g'unu mee

ono. ?Bụ ụnu kparụ iphe, unu meru egube ono? ³ Eshinu o dū nno bẹ iphe, mu efulu unu nta-a bụ lẹ mu taa chifuekwaru unu ndu ono. Epe a-buru unu aghamehu; teme agwa phe, a-buru onya, unu a-nmalahuje.” ⁴ Ojosi-imigwe, shi l'eka Chipfu ono pfuchaerupho ndu Izuru lu iphe ono; epe tushia uzu-ekwa. ⁵ Oo ya bu; epe gube aka ono “Bokimu, uzu-ekwa.” Epe nodu l'eka ono gwaa Chipfu.

Anwuhu Jioshuwa

⁶ Tobudu iya bu Jioshuwa suchaa ge ndu Izuru lu lasha; onyenonu laa je enwechaaru oke ali nkiya. ⁷ Epe bakotaru Chipfu eja le teke Jioshuwa no ndzu; mekwapho le teke ndu bu ogerenya ophu ka Jioshuwa aka nka no ndzu, bu iya bu ndu ono, humakotaru iphe, du biribiri, Chipfu meshiru ndu Izuru lu ono. ⁸ Onye-ozu Chipfu, bu Jioshuwa; nwa Nunu be noru ukporo apha ise l'apha iri; o nwuhu. ⁹ Epe lia ya l'eka o nweru ali le mkpukpu Timunatu-Heresu, no l'ali ubvu ubvu Ifuremu l'uzo isheli ubvu Gashi. ¹⁰ Ogbo k'ono nwushihu-gbuchaepho lapfuchaa nna phe; ogbo ozo bya alufuta, bu ndu ta amadu Chipfu; ophu efulu k'iphe, du biribiri ono, o meshiru ndu Izuru lu ono.

Ndu Izuru lu abaru Balu eja

¹¹ Tobudu iya bu; ndu Izuru lu meahaa ejo-ememe l'enya Chipfu; bya awata abaru Balu eja; ¹² mbu; paru Chipfu, bu Chileke ke nna phe haa, bu onye ono, dufutaru phe l'ali Ijiputu ono. Epe tsoru iphe, bu agwa ndu bupheru

phẹ mgburugburu baaharu eja. Ephe kpatsunu Chipfu ehu-eghu; ¹³ kele ephe paru Chipfu haa; baaharu agwa Balu; waa Ashitoretu eja. ¹⁴ Tobudu iya bu; oke ehu-eghu Chipfu dapfuta ndu Izurelu; o woru phẹ ye l'eka ndu o-lwua-olaa; ephe lwua phẹ alwulwu. O nwuru phẹ nu ndu ohogu phẹ, bupheru phẹ mgburugburu, bu ndu ephe ta aduedu ike wotaba ogo ozoba. ¹⁵ Ekameka, ephe jekporu be Chipfu ahaje e phẹ pho; g'e emekpee phẹ; mbu egube ono, o pfuhawaru phẹ l'oo-nodu anwuru phẹ ono. O bunuru iya bu l'ephe anodunu l'oke iphe-ehuka.

¹⁶ A nonya Chipfu bya emee ephe nweru ndu-ikpe, bu ndu adzoje phẹ l'eka ndu lwutaru phẹ nu. ¹⁷ Obenu l'ephe ta angabekwarupho ndu-ikpe phẹ ono nchi; kele ephe tsolewu-apharwushi onwophe l'abaru agwa eja. Ephe dakoberu gbakuta azu l'etso uzo ono, nna phẹ tsoru ono, bu iya bu; eme ekemu Chipfu. Ephe te emeduru ge nna phẹ. ¹⁸ O nodu abujeru teke Chipfu meru g'ephe nweru Onye-ikpe; o swiru onye-ikpe ono eswiru; gude onye-ikpe ono dzotakota phẹ l'eka ndu ohogu phẹ jasu g'onye-ikpe ono a-no-beru ndzu. Iphe, kparu iya nu buru l'ude, ephe atsuje le k'ishi, ndu ono akparya phẹ; me k'ehu, ephe anoduje emekpa phẹ; be l'emeje imemini phẹ adu Chipfu. ¹⁹ Teke onye-ikpe ono nwuhuerupho; ephe adakobe; kabaa apharwushi onwophe eme le ge nna phẹ meru; mbu ephozeru agwa abaru iya eja. Ephe te ekweddu haa ejo-ememe phẹ; ophu ephe ta ahaduru ekwefuru Chipfu ike. ²⁰ No iya;

oke ẹhu-eghu Chipfu dapfuta ndu Ízurelu; ọ sù: “Eshinu ọha-a mebyiwaru ọgbandzu ono, mu meru doberu nna phe ono; ọphu ẹphe ta angajeedu nchi l'iphe, mu pfuru; ²¹ be mu ta abyadu achifukwaduru phe ọha ono, Jioshuwa ta chishiduru; teme ọ nwuhu ono. ²² Mu egude phe huta ndu Ízurelu ama; maeduru ?ẹphe a-wata etso mube Chipfu egube nna phe oche tsoru mu?” ²³ Oo ya bu; Chipfu paru ọha ono haa; ọphu o woduru phe ye Jioshuwa l'eka; mbu shi nno chishi-kebe phe egwegwa.

3

Ọha, Chipfu ta achishiduru ndu Ízurelu

¹ Waa ọha ono, Chipfu paru haa g'o gude hua ndu Ízurelu ama; mbu ndu Ízurelu, ndu ọphu ta amadu k'ogu ono, alwuru l'ali Kėnanu ono. ² Iphe, kparu iphe o meru iphe-a bu g'o gude iya zia unwu Ízurelu ndu ọphu te eshidu maru g'aalwuje ogu egube aalwuje iya. ³ Ọha ono bu umadzu ise, bu ndu-ishi ndu Filisitayinu; me ndu Kėnanu l'ọphu; me ndu Sayidonu; me ndu Hevu, bukota l'ubvu ubvu Lėbanonu; e-shikpo l'ubvu Belu-Hamonu je akpaa le mkpukpu Lebo-Hamatu. ⁴ Chipfu ta achishiduru phe g'o gude phe hutaje ndu Ízurelu ama g'o maru; ?ẹphe e-meje-a ekemu Chipfu; mbu ekemu ono, o shi l'eka Mosisu turu nu nna phe ono. ⁵ Ndu Ízurelu buru l'echilabo ndu Kėnanu; me ndu Hetu; me ndu Amoru; me ndu Pėrezu; me ndu Hevu; waa ndu Jiebusu. ⁶ Ndu Ízurelu wata alu unwada ndu

ono; bya ewojekwarupho unwada nkephe kee unwoke ndu ohozo ono; bya abaahakwarupho agwa phe eja.

Otuniyelu adzo ndu Ízurelu

⁷ Ndu Ízurelu bya emee ejo-ememe l'ènya Chipfu. Ephe zoharu Chipfu, bu Chileke phe; baaharu Balu me Ashera eja. ⁸ Tòbudu iya bu; Chipfu swibenuru ndu Ízurelu ehu-eghu; k'ophu o nwuru phe ye l'èka Kushanu-Rishatayimu, bu iya bu eze ndu Mesopotémiya. Ndu Ízurelu ndu Kushanu-Rishatayimu l'èka apha esato. ⁹ A nonyaa; ndu Ízurelu raku Chipfu; o nu phe onye ndzota, bu Otuniyelu nwa Kenazu; mbu Kenazu, bu nwune Kalebu ke nwata; o dzota phe. ¹⁰ Unme Chipfu bya eji iya ehu; o bya aburu onye-ikpe ndu Ízurelu. O tugbu jeshia ogo; Chipfu woru Kushanu-Rishatayimu, bu eze ndu Mesopotémiya ye iya l'èka; o lwu-kpee Kushanu-Rishatayimu. ¹¹ Tòbudu iya bu; ali ono buru le nchi-odoo ukporo apha labo. Oo ya bu Otuniyelu, bu nwa Kenazu bya anwuhu.

Ehudu adzo ndu Ízurelu l'èka ndu Mówabu

¹² No iya; ndu Ízurelu bya emekwaa ejo-ememe ozobaa l'ènya Chipfu. Oo ya bu; Chipfu gude nu k'ejo-ememe ono ephe meru ono mee Egulonu, bu eze ndu Mówabu o kapyabe phe. ¹³ Oo ya bu; Egulonu je akpako ndu Amonu; waa ndu Amaleku; ephe je alwu-kpee ndu Ízurelu. Ephe nata phe mkpukpu Oha-mpfu ono. ¹⁴ Ndu

Ízurelu nọ l'ẹka Ẹgulonu, bụ eze ndu Mówabu ono apha iri l'ẹsato.

¹⁵ Ọle ndu Ízurelu rakuerupho Chipfu; ọ nụ phez onye ndzota, bụ Ehudu; nwa Gera; bya aburu onye shi l'okpa-ipfu Benjiaminu. Ọ bụ onye eme ẹkicha. O be teke ndu Ízurelu byaru aturu utu nụ iya g'o je anụ Ẹgulonu, bụ iya bụ eze ndu Mówabu; ¹⁶ Ehudu bya emeta oguechi, atsụ nkọ akpata iphu labo, ogologo iya habe gę nkwo-ẹka lanụ; woru nwua l'ime uwe iya l'utapfu okpa ẹkutara. ¹⁷ O je eworu utu ono nụ Ẹgulonu, bụ eze ndu Mówabu. Ẹgulonu bę bụ onye dụ okporokpo. ¹⁸ Ọ nọbechaa ya iphe ono; ọ bya edufu ndu ono, shi vuru iphe ono, ẹphe tataru ono. ¹⁹ E rwuepho l'agwa, nọ-kube mkpukpu Gilugalu; ọ ghakọbe lashia azụ je asụ: "Jiko eze; ọ duru ozi, mu e-zi ngu lę mpya."

Eze ono sụ ndu-ozi iya: "Unu gebeeshikwa-o!" Ọo ya bụ; ẹphe tuko gbado iya tųgbua.

²⁰ Noo ya; Ehudu bya ejekube iya ntse l'ẹka ọ nọ nkinyi iya l'ime mkpuru ụlo-eli ono, bụ ẹka ka ejidata ejidata; je asụ iya: "Ọ duru ozi, shi Chileke l'ẹka mu eme gę mu zia ngu." Eze gbalihuẹpho l'oshi, ọ nọ anọ; ²¹ Ehudu gudeẹpho ẹkicha miřuta oguechi ono l'utapfu okpa ẹkutara iya ono; woru iya nmaa eze ono l'ẹpho. ²² Ogu-echi ono bahugbua ya l'ẹpho jeye l'ishi iya; ẹba rimia oguechi ono; k'ophu bụ lę Ehudu bę haru iya amiřuta. Akurepho kposhihu iya. ²³ Tọbudu iya bụ; Ehudu bya abahụ l'oma ụlo ono; woru mgbo k'ulo-eli ono

gụ-chishikọta; guburu iya ye; woru iya tụ-chishia. ²⁴ Ọ tughbuchaepfo; ndu ejeru eze ono ozi bya eje ahuma lẹ mgbo ụlo-eli ono bẹ a tụ-chishikọtaru atụ-chishi; ephe sụ: “Ọo-bụkwaru unme bẹ ọotuta l’ime mkpuru ụlo-eli ono.” ²⁵ Ephe nọdu kwabẹ gbiriri jasụ ọdu tsuru pẹ; ephe ghadashiaha; ọphu ọ tọ gụhaduru pẹ ụzo. Ephe bya ewota ire-igodo tūhashia ụzo ono. Ephe bya ahuma nnajiuphu pẹ ono g’ọ dabyiru l’oma-ulo ono; nwuhuwaa anwuhu.

²⁶ Ehudu bụ teke ono, ephe nọ kwabẹ pọ bẹ o pyofuru gbalaa; shia ụzo ẹka ono, agwa nọ ono; gbaru lashia mkpukpu Seyira. ²⁷ Ọ gbarwuepfo l’eka ono; ọ nọdu l’alị úbvú úbvú Ifuremu woru opu gbua; ndu Ízurelu wuru tsoru iya; a -gbẹ l’úbvú ono; yẹbedua vuta ụzo. ²⁸ Ọ sụ pẹ: “Unu tso mu! Chipfu yeakwaru unu ndu ọhogu unu, bụ ndu Mówabu l’eka.” Ọo ya bụ; ephe wuru tsoru iya; je anọ-chishikọta ẹnymu Jiódanu l’eka dukota chara chara, bụ ẹka eeshije gude ọkpa dafu mkpukpu Mówabu; ọphu ephe ekwedu g’o nweru m’onye lanu a-dafu azu iya ọphuu. ²⁹ Ephe gbua ndu Mówabu ono iphe, rwuru ukporo unu nemadzu l’unu ise lẹ teke ono; mbụ ndu bukota mkparawa ọkpehu dukota; ọphu ọ dudu m’onye lanu, nahuru nu. ³⁰ Ndu Ízurelu lwuta ndu Mówabu lẹ mbọku ono; ephe nọdu pẹ lẹ mkpula. Tọbudu iya bụ; alị ono nọdu lẹ nchi-odoo ukporo apha ẹno.

Shamuga l’adzota ndu Ízurelu

³¹ Ehudu bughechaepfo ishi; Shamuga, bụ nwa Anatu bya aburu ishi. Ọ buru yẹbedua

gude mgboro chigbushia ndu Filisitayinu unu nemadzu l'ukporo umadzu iri. Yebedua bukwapho onye dzoru ndu Izurelu.

4

Debora me Baraku adzota ndu Izurelu l'eka ndu Kenu

¹ Tobudu iya bu; Ehudu nwuhuchaa; ndu Izurelu meahaa ejo-ememe l'anya Chipfu ozo. ² Chipfu woru phe ye Jiabinu, bu eze ndu Kenu l'eka. Eka o no buru eze be bu le mkpukpu Hazo. Onye-ishi ndu ohogu iya buru Sizera, onye bu le mkpukpu Haroshetu-Hagoyimu. ³ O gude kele o nweru ugbo-inya, e meru l'igwe; unu labo l'ukporo ise kpaa ndu Izurelu owechorochooro apha ukporo. Tobudu iya bu; ndu Izurelu raku nu Chipfu g'o gbaaru phe mkpu.

⁴ Debora, bu nwanyi epfuchiru Chileke; mbu nyee Lapidotu bu onye-ikpe ndu Izurelu teke ono. ⁵ Eka o shi anoduje bu le mkpula mpfu Debora, no le mgbaka mkpukpu Rama yele mkpukpu Betelu l'alij ubvu ubvu Ifuremu; ndu Izurelu awu ejepfu iya g'o kpeeru phe ikpe. ⁶ Oo ya bu; o bya ezia e je ekua Baraku nwa Abinowamu, shi le mkpukpu Kadeshi, no l'alij ndu Nafutali. O su iya: "Chipfu, bu Chileke ndu Izurelu be ziru ngu su g'i tugbua je achita unwoke ndu Nafutali; me unwoke ndu Zebulun ukporo unu nemadzu l'unu ise yeru onwongu; duru phe g'unu shia uzo ubvu Tabo. ⁷ Mu e-me Sizera, bu onye-ishi ndu ojogu Jiabinu; g'o chiru

ugbo-inya iya; yele ndu ojogu iya; bya l'enyimu Kishonu; mu eworu Sizera ye ngu l'eka."

⁸ Baraku sụ iya: "Ọ -buru l'ii-tsuru mu je; be mu e-jekwa-a; teke i tii tsodu mu je be mu tee jekwa."

⁹ Debora sụ iya: "Ọ duepho ree; mu le ngu a-swiru-a je; ole ubvu, no l'iphe-a, iibya ejeje-a be taa bukwannuru nkengu. Ishi iya bu l'oo nwanji be Chipfu e-me; l'o gude Sizera." No iya; Debora gbalihu tsoru Baraku; ephe jeshia Kadeshi. ¹⁰ O buru le Kadeshi be Baraku rwukoberu ndu Zebulun waa ndu Nafutali ephe doru. Ndu o gude jee bu ukporo unu nemadzu l'unu ise. Debora tsokwaru phe pho.

¹¹ No iya; Heba, bu onye Kenu, bu iya bu oshilokpa Hobabu, bu nwune nyee Mosisu; bufu onwiya l'eka ndu Kenu no. O tughua je eworu ulo-ekwa iya kpo be l'upfu achi, no le mkpukpu Zanimu, no le mgboru ali Kadeshi. ¹² Tobudu iya bu; epfuaru Sizera le Baraku nwa Abinowamu be jeshiakwaru l'ubvu Tabo; ¹³ Sizera chitakota ukporo unu ugbo-inya igwe iya labo l'ukporo ugbo-inya igwe ise; me unwoke, ephe l'ia no l'ophu; shi le mkpukpu Haroshetu-Hagoyimu jeshia l'enyimu Kishonu.

¹⁴ Noo ya; Debora sụ Baraku: "Ngwa! Oo ntanu-a be Chipfu woru Sizera ye ngu l'eka." Sụ iya: "Chipfu vutahaakwaru uzo." Oo ya bu; Baraku chiru ukporo unu ojogu labo l'ukporo iri nyizetakota l'ubvu Tabo. ¹⁵ Chipfu gude oguechi Baraku meru eberebete tu Sizera; me ugbo-inya iya l'ophu; waa ndu ojogu iya g'ephe ha. Sizera pfufuta l'ugbo-inya iya chie okpa l'oso.

¹⁶ Baraku chipyabe ndu ojogu Sizera; mę ugbo-
inya phe jasụ ęphe rwua Haroshetu-Hagoyimu.
O buru ogu-echi be e gude gbushikota ndu ojogu
Sizera. Ophu o dudu m'onye lanu, phoduru nu.

Jiayelu egbu Sizera

¹⁷ No iya; Sizera gude okpa gbaru lashia l'ulo-
ekwa Jiayelu, bu nyee Heba; onye Kenu. O buru
iphe, kparu iya nu bu le Jiabinu, bu eze ndu
Hazo be yele ndibe Heba, bu iya bu onye Kenu
ono du le ree. ¹⁸ Jiayelu gbagbua je agba Sizera
ndzuta; bya asu iya: "Nnajiuphu mu tokwa ehul!
Gbatata! Ta atsushi ebvu!" O gbapfu nu iya
l'ulo-ekwa ono; o bya eworu ekwa kpube iya.
¹⁹ O su iya: "Jiko kenna mu mini ge mu ngua;
kele egu mini agukwa mu." O kpuhaa iphe,
ooyeje mini-era-eswi; gbata iya nu iya; o ngua.
O bya ewokwaru ekwa ono kpuchia ya. ²⁰ O su
nwanyi ono: "Pfuokwaru l'onu-abata ulo-ekwa
ono; k'ophu bu; o -duru onye byaru bya ajia ngu
su: '?O nweru onye no l'eka-a?' l'ii-sukwanu iya:
'Waawaa!' "

²¹ Obenu le Jiayelu, bu nyee Heba gbę wota
nggu, eegudeje kpobe ulo-ekwa; bya ewota
ongu; pyaa mpya jepfu iya; je egude ongu
ono kpobe iya nggu ono l'ishi nchi. O foo ya
bahu l'ali; kele mgbenya tu-rwewaru iya atu-
rwe; teme ike bvushikwa iya pho. O buru
iya anwuhu. ²² A bya l'amaru; Baraku nodu
agbaghawaa l'eka ochikwanu Sizera; Jiayelu
lufuta gbapfuta iya; bya asu iya: "Bya; ge mu
goshi ngu nwoke ono, icho ono." Tobudu iya
bu; o bya etsoru nwanyi ono bahu; bya ahuma

Sizera g'ò dabyiru nwùhuwaa anwùhu; nggu kpòru iya l'ishi-nchì.

²³ Ọ bụru lẹ mbọku ono bẹ Chileke meru Jiabinu, eze ndu Kénanu; ọ laa ndu Ízurelu l'ẹka.

²⁴ Ike ndu Ízurelu bya akapyabẹ kẹ Jiabinu, bụ eze ndu Kénanu ọkpobe akapyabẹ gbiriri jasụ ẹphe lwụ-kpee ya.

5

Ebvú, Debora yẹ Baraku gụru

¹ Lẹ mbọku ono bẹ Debora yẹ Baraku nwa Abinowamu gụru ebvú-a sụ:

² “Ndu-ishi ndu Ízurelu vutaru ụzo ọgu;
ndu Ízurelu l'ophu gude obu phẹ tsoru phẹ;
unu jaa Chipfu ajaja!

³ Unu nụma iphe-a; unubẹ ndu eze!

Unu ngabẹ nchì; unubẹ ndu-ishi!

Mu a-gụ ebvú nụ Chipfu; mu a-gụ ebvú gụ-ku
iya;

mbụ lẹ mu e-gude ebvú jaa Chipfu, bụ
Chileke ndu Ízurelu ajaja.

⁴ Gụbe Chipfu; teke ị lụfuru l'alị Siye;

mbụ teke ị zọru garamugaramu lụfu l'alị ndu
Edọmu

bẹ mgboko nmahuru jiiijiii;

igwe rwua erwurwu; wa mini.

⁵ Úbvú bẹ nmakotaru jiiijiii l'iphu gụbe Chipfu;
mbụ jeyekpọ l'úbvú Sayinayi bẹ nmacharu
jiiijiii

l'iphu gụbe Chipfu, bụ Chileke kẹ ndu
Ízurelu.

- 6 Lẹ teke kẹ Shamuğa nwa Anatu; waa Jiayẹlu
bẹ a gwọberu eshi eze gbororo;
ndu ije pyoaha ntubo.
- 7 Iphe, bu mkpukpu, nọ lẹ Ízurelu dabyikọtaru
iphoro;
gbiriri jasuru Debora futa;
bya aburu ne ndu Ízurelu.
- 8 G'ẹphe hataru agwa ọphúú; bẹ ọgu wataru ada
l'alí Ízurelu gbaa mgburugburu;
ọphu ọ dudu mẹ iphe, eegudeje egbobuta
onwonye; ọzoo arwa, a humaru l'echilabo
ukporo unu nemadzu ise, nọ l'alí Ízurelu.
- 9 Ndu-ishi ndu Ízurelu du mu l'obu;
mbu ndu turu obu phe onyo wofuta on-
wophe onoya.
Unu jaa Chipfu ajaja!
- 10 Unube ndu ono agba l'eli nkafu-igara ocha; a;
mbu unube ndu ono, nọ l'eli ukpo, a
wukoberu l'eli nkafu-igara;
mẹ unube ndu eje l'okpa;
- 11 unu geedukwa olu-ebvu ndu ono, agu
ebvu l'eka eekutaje mini ono.
- Ọo l'eka ono bẹ ẹphe a-nodu gua ebvu k'iphe,
pfuru oto, Chipfu mekotaru;
mbu iphe, pfuru oto, o mekotaru ndibe iya
lẹ Ízurelu.
- Tobudu iya bu; ndibe Chipfu wufu jeshia l'onu-
abata mkpukpu.
- 12 'Gbalihukpodapho! Debora gbalihu!
Gbalihu! Gbalihu! Chiswee ebvu!
Baraku; gbalihu!

Gube nwa Abinowamu; duta ndu i kpuru le ndzu.'

13 Tɔbudu iya bu; unwoke ophu phoduru nu wu-
pfushia ndu-ishi.

Ndibe Chipfu wuru byapfuta mu g'anyi tsoo ndu
okpehu du ogu.

14 Ndu Ifuremu, bu ndu ophu gbaru ogbarabvu
l'ubvu ubvu Amaleku
wufuta tsoru gube Benjaminu; gu le ndibe
ngu.

Ndu-ishi-ojogu, shi l'ali ndu Makiya
wufutakwapho;
ndu shi l'ali Zebulun bu ndu gude
mgboro onye-ishi-ojogu.

15 Ndu-ishi ndu Isaka; ephe le Debora tuko
swiru.

Nokwapho ge ndu Isaka l'onwophe
wukwarupho tsoru Baraku; gbazeta le
nsuda ono.

Ophu obu anodu ndu Rubenu l'eka lanu.

16 ?Bu gunu be unu doru l'odu aturu eme?

?Bu g'unu numa okwe onye eche aturu akpo
gude ekukobe aturu iya too?

Ndu Rubenu be agba egomunggo shii.

17 Ndu Giladu be kwaru l'azu enyimu Jiordanu.

?Bu gunu be ndu Danu gugaru kwaa l'ugbo-
mini?

Ndu Asha kwaa l'aguga enyimu;
mbu l'odu ugbo-mini.

18 Ndu Zebulun mia enya le ndzu kweta onwu.
Nokwapho ge ndu Nafutali mikwarupho enya le
ndzu bu ono;
mbu l'egu ogu ono.

- 19 Ndu eze byaru; ẹphe lwua ọgu ono.
 Ndu eze ndu Kėnanu bẹ lwuru ọgu ẹ mkpukpu
 Tanaku;
 ẹ mgboru mini mkpukpu Megido;
 ọphu ẹphe alwutaduru mẹ mkpola-ọchaa.
- 20 Kpokpode bẹ gbẹchaa l'akpaminigwe alwu
 ọgu;
 mbu l'ẹphe shichaa l'ẹka ẹphe eshije; etso
 Sizera ọgu.
- 21 Ẽnyimu Kishonu tuko phẹ kpota;
 mbu ẹnyimu shi l'ichee ono, bu iya bu
 ẹnyimu Kishonu.
- Gube obu mu; gude ike zoru je l'iphu!
- 22 No iya; igiji ọkpa inya nodu ada g'egbigwe.
 Mbu inya, ọkpehu du nodu agbagbaa ke
 kwaakwa.
- 23 Ojozi-imigwe, shi l'ẹka Chipfu suru: 'Unu tua
 mkpukpu Merozu onu;
 mbu; unu tua phẹ ẹjo onu;
 kele ẹphe ta abyaduru eyetaru Chipfu ẹka
 l'ọgu;
 mbu yetaru Chipfu ẹka lwua ndu ike du
 l'ọgu.'
- 24 Ge Jiayelu; mbu nyee Heba, bu onye Kenu
 bukwaru onye aa-kachaa agoru onu-oma
 nu l'iphe, bu unwanyi;
 g'ọ buru iya bẹ aa-kachaa agoru onu-oma nu
 l'iphe, bu unwanyi, bu l'ulo-ekwa.
- 25 O raru ora mini; o nu iya mini-era-eswi.
 Mbu l'oo l'iphe, gbaru ndu eze bẹ o yeru iya mini
 era-eswi.
- 26 O dzu-liru nggu ulo-ekwa;
 bya egude ẹkutara palia ongu ndu-ozu;

kpọbe iya Sizera l'ishi-nchị;
tsupyabẹ iya ishi l'ali; kpọ-fua ụzo.

27 Ọ bụru lẹ mgboru ọkpa iya bẹ o phozeru;
dabyiru.

Mbụ l'ọo lẹ mgboru ọkpa iya bẹ o phozeru
dabyiru nwuhu.

Ọ bụru l'ẹka o phozeru ono bẹ ọ daru; nwuhu.

28 Lẹ windo bẹ ne Sizera gbẹ pyofu ẹnya.

Ọ nọdu l'ọnu-uzo ụlo-eli ara ẹkwa sụ:

'?Bụ ọnu kparu iphe, ụgbo-inya anọ ọdu
alwalwa?

?Bụ ọnu meru iphe, a ta nọda ụkporo ọkpa
ụgbo-inya iya?'

29 Ụnwumgboko ibe eze ndu ọphu kachaa amaru
iphe nọdu azu eyeru iya l'iphe, oopfụ;

tẹme yẹbedua nọdu azukwa iya phọ ekwe
l'onwiya.

30 Ẹphe nọdu asuje iya: '?Tọbudu iphe, ẹphe a-
kwata l'ọkwata bẹ ẹphe achọ; bya ekekwa
iya phọ ekeke?

Nwoke nọnu e-keta nwamgboko lanu; ọzoo ẹbo.

Sizera eketachaa uwe, ama ntumatu;

mbụ l'oo-ketachaa uwe, ama ntumatu, ak-
waru k'erengete;

waa ẹkwa, du ẹguru, mu a-tu-phuje l'olu;

mbụ ?ọ bukotaru iphe, a kwataru l'ọkwata?'

31 Gẹ ndu ọhogu gube Chipfu lakota l'iyi ẹgube
ono.

Ọle gẹ ndu yeru ngu obu gbukwa kẹ nwjinwii
g'ẹnyanwu, agbakota agbakota."

Tọbudu iya bụ; ali ono nweru nchị-odoo nọ
ụkporo apha labo.

6

Ndu Midiyanu akpa ndu Ízurelu ẹhu

¹ Ndu Ízurelu mekwa ẹjo-ememe l'iphu Chipfu ọzo. Chipfu woru phẹ yee ndu Midiyanu l'ẹka; ẹphe nọo phẹ l'ẹka apha ẹsaa. ² Ndu Midiyanu kpaa phẹ ẹhu k'ọphu ẹphe laru l'úbvú je emeshia ọlo waa m̀kp̀ù lẹ mgbaka mgbaka mkpuma; mẹ l'ọgba; mẹ l'ẹka a kpushigbaaru ike je ebugbaaru. ³ No iya; ọ nọdu abujeru teke ndu Ízurelu kọru opfu; ndu Midiyanu; mẹ ndu Amaleku; mẹwaro ndu buchaa l'uzo ẹnyanwu-awawa awuru bya etsoo phẹ ọgu naa phẹ iya. ⁴ Ẹphe nọdu ejeje anmaa anmanma ọgu l'alì ono; tuko iphe, ẹphe meberu l'alì mebyishikota; mbu mebyishikota iya nno je akpaa lẹ mkpukpu Gaza. Ọphu ọ dudu mẹ iphe, dzu ndzu, ẹphe ahajẹ lẹ Ízurelu; je akpachaa l'aturu; waa eswi; mẹ nkafu-igara. ⁵ Ẹphe achijeru ẹku phẹ; waa ọlo-ẹkwa phẹ zeru gbiigbiigbi g'igube; mbu k'ọphu a ta majeduru g'e-shi aguta phẹ l'ọgu ẹphe l'inya-kamelu phẹ; ẹphe abya aphunwua alì ono gbaa ya ophorokpo. ⁶ Ndu Midiyanu ono mee ndu Ízurelu; ẹphe kwata daa ukpa ọkpobe adada. No iya; ẹphe bya araku Chipfu g'ọ gbaaru phẹ mkpu.

⁷ Ọo ya bu; ndu Ízurelu rakuẹpho Chipfu lẹ k'iphe ndu Midiyanu eme phẹ ono; ⁸ o zitaru phẹ onye mpfuchiru Chileke, bu onye pfuru ndu Ízurelu sù: “Waa iphe, Chipfu, bu Chileke ndu Ízurelu epfu baa: Ọo mu bu onye ono, dufutaru unu l'alì Ijiputu; mbu l'alì ono, unu

shi buru ohu ono. ⁹ Mu nafutaru unu l'eka ndu Ijiputu me l'eka ndu shi akpa unu ehụ; mu chishikotaru unu ndu ono l'alị phe; woru iya nụ unu. ¹⁰ Mu pfiaru unu sụ l'oo mbedua, bu Chipfu, bu Chileke unu. G'unu ta abakwaru agwa ndu Amoru eja l'alị ono, unu bu ono. Olee unu te eyeduru mu onu."

¹¹ Noo ya; ojozi-imigwe, shi l'eka Chipfu bya bya anodu l'upfu achi, no le mkpukpu Ofura. Onye nwe achi ono bu Jiowashi, bu onye shi l'ipfu ndu Abiyeza. Nwatibe iya, bu Gidiyonu nodu l'eka aazoshije mee l'akpuru vayinu; echishi witi g'o wohaa ya ge ndu Midiyanu ta ahuma iya. ¹² Ojozi-imigwe, shi l'eka Chipfu ono bya achaa Gidiyonu l'ipfu bya asu iya: "Chipfu nokwa swiru ngu; gube ojogu, ike du."

¹³ Gidiyonu su iya: "Oowaa; nnajuphu mu; o -buru le Chipfu no swiru anyi; ?bu gunu meru g'o gude iphe-a nodu anwukotaru anyi? ? Denuhunu iphe-ohumalenya iya ono, nna anyi phe koru anyi ono; mbu l'ephe suru: 'L'oo Chipfu dufutaru anyi l'alị Ijiputu.' Olee nta-a be Chipfu obu gbe gwobewaa anyi; woru anyi ye l'eka ndu Midiyanu."

¹⁴ No iya; Chipfu bya adakobe su iya: "Gude ike, i nweru je anafuta ndu Izurelu l'eka ndu Midiyanu. O kpokwaa mbedua gedegede be ezi ngu su ngu g'i je."

¹⁵ Gidiyonu su iya: "Oowaa; nnajuphu mu; ? mu e-me ime-agma dzoo ndu Izurelu? Humanu l'o kwa unuphu k'anyi be enya kachakpo al-

walwa l'ipfu Manáse; ọ́ bụ́ru mu be kachaa alwa ali l'ónulo ibe nna mu."

¹⁶ Chipfu sụ́ iya: "Mu e-swiru ngu-a; mbụ́ l'ì-tụ́ko ndu Midiyanu lwụ́-kpekọ́ta g'ẹ́phe bụ́ onye lanu."

¹⁷ Gidiyọ́nu yeeru iya ọ́nu sụ́: "Ọ́ -bụ́ru le mu dụ́waa ngu l'obu; goshinu mu iphe, e-me ge mu maru l'ọ́ bụ́-a gụ́bedua be epfu eyeru mu nụ́.

¹⁸ Jiko ta atụ́gbukwa l'ẹ́ka-a jasụ́ ge mu byapfuta ngu; ge mu je ewota iphe, mu a-nụ́ ngu bya edoberu ngu l'ataphu."

Tọ́budu iya bụ́; Chipfu sụ́ iya: "Mu a-nọ́du-a jeye ìlwa azu."

¹⁹ Tọ́budu iya bụ́; Gidiyọ́nu bya abahụ́ l'ulo je eworu mkpi gbua shia; bya ewota utu iphe, egudeje eme buredi, jiru nkweka ghetu buredi, e te yeduru iphe, ekoje buredi. Ọ́ bya agushia anụ́ ono ye le nkata; wuru urwukurwuku iya ye l'itoshi. O gweta iya wojeru iya l'upfu achi ono.

²⁰ Ojozi-imigwe, shi l'ẹ́ka Chileke ono bya asụ́ iya: "Gweta anụ́ ono; me buredi ono dobe l'eli mkpuma-a; iwufutakwapho urwukurwuku iya ono." Gidiyọ́nu bya emekota iya nno. ²¹ Tọ́budu iya bụ́; ojozi-imigwe, shi l'ẹ́ka Chipfu ono bya eworu ononu mgboro, ọ́ gude l'ẹ́ka denyi l'anụ́ ye le buredi ono. Ọ́ku shi le mkpuma ono gbanwuhu; kepyashikota anụ́; me buredi ono. Ojozi-imigwe, shi l'ẹ́ka Chipfu ono phuhu.

²² Gidiyọ́nu maerupho l'oo Ojozi-imigwe, shi l'ẹ́ka Chipfu; ọ́ rashia: "Nnajiuphu, bụ́ Chileke mu-e! Alashikwa mu-o! Kele ọ́ kwa Ojozi-imigwe, shi l'ẹ́ka Chipfu be mu gude enya mu huma ono-o!"

²³ Chipfu sụ iya: “G'èhu dukwa ngu guu! Ta atsushi ebvu. I tii nwuhuduro.” ²⁴ Tòbudu iya bụ; Gidiyọnu kpọaru Chipfu ọru-ngweja l'èka ono; gùbe iya: “Chipfu bụ èhu-guu.” Ọru-ngweja ono bẹ nọepfo lẹ mkpụkpu Ọfura, nọ l'ali ndu Abiyeza byasụ ntanụ-a.

²⁵ L'enyashi mbọku onokwaphọ bẹ Chipfu sụru iya: “Kpụta oke-eswi k'èbo l'eswi nna ngu; mbụ ọphu gbawaru apha ẹsaa. Je enwukpọshia ẹnya ẹka nna ngu agwajẹ Balụ; gbutsushia itso Ashera, nọ iya l'agụga. ²⁶ I -mechaa g'i kpọaru Chipfu, bụ Chileke ngu ọru-ngweja, dukpoo rengurengu l'èka-a, ha l'eli-a. Ii gbẹ teke ono kpụta oke-eswi k'èbo ono; chita itso Ashera ono, i gbutsushiru ono gude nkụ iya gwee ngweja-akpọ-ọku.” ²⁷ Tòbudu iya bụ; Gidiyọnu bya achita ndu-ozii iya unwoke iri; bya emee gẹ Chipfu pfuru iya ono. Ọ bụru l'enyashi bẹ o mekọtaru iphemiphe ono. Ọphu o meduru iya l'eswe; kele ọotsu ndibe phẹ waa unwoke mkpụkpu ono ebvu.

²⁸ Ndu mkpụkpu ono lufutashia l'onmewa ụtsu; bya ahuma l'a gbẹ mebyishikọtawa nụ ẹka ẹphe agwajẹ Balụ; gbutsushiwa itso Ashera, nọ l'agụga iya; bya eworu oke-eswi k'èbo ono kpọọ ọku l'eli ọru-ngweja ono, a gbẹ kpụwaanu l'èka ono. ²⁹ Ndu mkpụkpu ono bya ajiahaa: “?Bụ onye meru iphe ọwa?” Ẹphe kpanyaa ishi; jikashinyaa; a sụ phẹ l'ọ kwa Gidiyọnu nwa Jiowashi bẹ meru iya nụ. ³⁰ No iya; ndu mkpụkpu ono bya epfuaru Jiowashi sụ iya: “Je edufuta nwa ngu. Ọo-nwuhu; kele o tsukpọshiru

enya eka aagwaje Balu; bya egbutsushia itso Ashera, no l'aguga iya."

³¹ Iphe, Jiowashi pfuru ndu ono, no-pheru iya mgburugburu ehuka ehuka ono be bu: "?Unu agbaru Balu odzori? To o g'unu dzoo ya be unu eme? Onye agbataru Balu be ee-gbukwa l'utsu. O -buru-a le Balu be bu okpobe agwa be teke nemadzū mebyishiru oru-ngweja iya be o-du nu ike gbaaru onwiya odzori." ³² O buru le mboku ono be a guberu Gidiyonu "Jieru-Balu;" bu iya bu: "Ge Balu gbaa mkpu onwiya"; kele Gidiyonu be tsukposhiru enya eka aagwaje Balu.

³³ Tobudu iya bu; ndu Midiyanu l'ophu; me ndu Amaleku; waa ndu bugbaa l'uzo enyanwu-awawa bya atuko ndu ojogu phe dzukobe; bya awufu azu enyimu Jiodanu azu iya ophuu; je anmaa le nsuda Jiezerelu. ³⁴ Oo ya bu; Unme Chipfu bya eji Gidiyonu ehū; o woru opu gbua gude kukota unwu Abiyeza g'ephe tsoru iya. ³⁵ O byakwapho eye ndu-ozī ephe zikota ozi l'alī ndu Manase l'ophu g'ephe kwaa ngwogu; bya ekukokwapho ndu Asha; me ndu Zebulon; waa ndu Nafutali; ephe wuru byapfuta phe.

³⁶ Gidiyonu bya asu Chileke: "O -buru l'ii-shi l'eka mu dzoo ndu Izurelu egube ono, i kweru mu ukwe iya; ³⁷ lenu; mu a-kube eji aturu l'eka eechishije witi-a. O -buru l'oo l'oji aturu-a be iji dashiru kpoloko; ophu o to dashiduru l'oma ali l'ophu; mu amaru l'ii-shi-a l'eka mu dzoo ndu Izurelu egube ono, i pfuru iya ono." ³⁸ No iya; o meepho egube ono, Gidiyonu pfuru ono. O bya agbalihu le nchitabohu iya je apyia eji aturu

ono mini; pyita iya mini, jiru gbamuḡbamu, eku mini. ³⁹ Tòbudu iya bu; Gidiyónu sù Chileke: “Jiko g'èhu-eghu ngu te ejekwa aburu oku dapfuta mu; gè mu rwofunu ngu iphe lanu. Gè mu gudeeshi eji aturu ono hutafua ama ugbo lanu. K'ogiya-a; mee g'èji aturu ono kpohukota nku; l'i mee g'iji dashikota l'oma ali l'eka ono.” ⁴⁰ L'enyashi mboku ono be Chileke meeru iya pho egube ono. Eji aturu ono kpoloko be iji ta adashiduru; o dashikota l'oma ali l'ophu.

7

Gidiyónu alwu ndu Midiyanu

¹ O -rwua l'onmewa utsu; Jieru-Balu, bu iya bu Gidiyónu yee ndu ojoḡu iya l'ophu wu-lihu je anmaa anmanma oḡu le mgboru obvu-mini Harodu. Ndu Midiyanu doru le nsuda, no l'uzo isheli ibiya ophu ephebedua no; le mgboru ubvu More.

² Chipfu bya asu Gidiyónu: “Ndu ojoḡu ngu be hanukakwaru mu igwerigwe ge mu e-woru ndu Midiyanu ye phe l'eka. Iphe, ii-me nta-a ge ndu Izurelu ta anodushi epfuru mu l'oo ike phe be ephe gude dzoo onwophe ³ bu g'i je araaru iya ephe arara nta-a su phe: ‘Teke o dukwaru onye ehú anmaa anmanma le ndzu-agugu; g'onye obu shikwa l'ubvu Giladu-a lashia.’ ” No iya; ukporo unu nemadzu ugbo labo l'unu iri l'ise zehu lashia; o buwaru ukporo unu nemadzu l'unu ise be phoduru nu.

⁴ Obenu le Chipfu pfuleru-a Gidiyónu su: “Ndu ono be panukakwarupho igwerigwe. Chita phe

je lẹ mini gẹ mu hụchaaru ngu ẹphe ama l'ẹka ono. Onye mu sụru l'oo-tsoru ngu je; bẹ e-je nụ. Onye ọphu mu sụkwanuru l'o too tsoduru ngu eje bẹ te ejekwa.”⁵ Ọo ya bụ; Gidiyonu duta ndu ono jeshia lẹ mini. Chipfu sụ iya: “Dobe ndu ọphu gude ire angụ mini gẹ nkuta anguje-a iche; l'i dobekwapho ndu ọphu gbushiru ikpere angụ iya iche.”⁶ Ọ bụru ụmadzu ụkporo iri l'ise bẹ gude ẹka kwota mini ono ye l'onu. Ndu ọphuu l'ophu bẹ tukuru gbushikota ikpere g'ẹphe nguta iya.⁷ No iya; Chipfu sụ Gidiyonu: “Ọo ụmadzu ụkporo iri l'ise ono, gude ẹka kwota mini ye l'onu ono bẹ mu e-gude dzoo unu; mbụ woru ndu Midiyanu ye unu l'ẹka. Gẹ ndu ọphuu tuko lashichaa ibe phe.”⁸ Ọo ya bụ; ndu k'ophuu vulia nri; bya achita opu-ogu ndu k'ophuu. Gidiyonu sụ phe g'ẹphe lashichaa unuphu. Ọ bụru ụmadzu ụkporo iri l'ise pho bẹ o haru. Ẹka ndu Midiyanu doru bụru l'uzo alị lẹ nsuda ẹka ono, Gidiyonu phe doru ono.

⁹ Ọ -rwua l'enyashi mboku ono; Chipfu sụ Gidiyonu: “Gbalihu; je adatso ndu Midiyanu ọgu; kele mu wowaru phe ye ngu l'ẹka.”¹⁰ Ọ -buru l'itsu ebvu eje phe etso ọgu; gẹ gụ lẹ Pura, bụ onye-ozu ngu swiru je l'odu-ogu phe ono.¹¹ Ii-numawaro iphe, ẹphe epfu. I -numachaa ya bẹ oo-me-a g'obu shihu ngu ike gi je ọgu l'odu ono.” Tọbudu iya bụ; yele Pura, bụ iya bụ onye-ozu iya ono swiru jerwua azu ẹka ndu ojogu ono doru.¹² Ndu Midiyanu ono; mẹ ndu Amaleku; mẹ ndu shikota l'uzo enyanwu-awawa tuko nmaa ẹrupfu g'igube lẹ nsuda ono. Inya-kamelu phe bụru aguta aguta; mbụ byierupho g'ẹja, no

l'agụga eze-enyimu.

¹³ Gidiyọnu jerwua; bya ahuma gę nwoke lanu ezeru ọnyà iya nrwọ, ọ rworu asuje iya: “Mu rworu nrwọ g'ishi buredi, du mgburugburu, e meru le balị ewe kperekpere ewebata l'eka ndu Midiyanu nmaru anmanma ọgu. Ishi buredi balị ono weru bya asua l'ulo-ekwa; suta iya tua; ọ daa gwoo; kpoo mkpomishaku.”

¹⁴ Ọo ya bu; ọnyà iya ono su iya: “Iphe-a ta adukwa iphe ozo, ọ bu; abudu ogu-echi Gidiyọnu nwa Jiowashi, bu onye Izurelu; kele Chileke woakwaru ndu Midiyanu waa ndu ojogu phe l'ophu ye iya l'eka.”

¹⁵ Tọbudu iya bu; Gidiyọnu numa nrwọ ono, e zeru ono; waa iphe, ọ bu; ọ bya abaarụ Chileke eja. Ọ buru iya ala azu l'odu-ogu ndu Izurelu; je asu phe: “Unu wu-lihu-o! Chipfu woakwaru ndu ojogu Midiyanu ye unu l'eka.” ¹⁶ Ọ bya eworu umadzu ukporo iri l'ise ono kee uzi eto; bya eworu opu-ogu nuchaa phe; wakwapho ite nshii, duchaa iphoro, owá nuchaa l'ime. ¹⁷ Ọ su phe: “Unu lee mu enya! Unu meje gę mu meru. Teke mu rwuerupho l'onu eka ono, ephe doru ono; unu tsokwaru mu mejekpoephe gę mu meru. ¹⁸ Teke mu le ndu ophu mu l'ephe swi gburu opu-ogu; g'unubedua ndukwapho l'eka unu no gbaa odu phe ono mgburugburu gbua nkunu; chia mkpu su: ‘A kwa ogu-echi ke Chipfu waa Gidiyọnu-o!’ ”

¹⁹ Tọbudu iya bu; Gidiyọnu yele umadzu ukporo ise ono, ephe l'iya tuko swiru ono jerwua l'onu eka ono, ndu Midiyanu ono doru ono le

teke a watawaru eche nche k'echi abali. O buerupho teke ono be ndu ophu no le nche lufuru; ndu ozo bahuwaa le nche. Gidiyonu phe woru opu-ogu phe ono gbua; bya eworu ite nshii ono, epe gudechaa l'eka pho tukposhia.

²⁰ G'ephe hakota uzi eto ono woru opu-ogu nkephe gbua; bya atukposhichaa ite ono. Epe pagbaaru owá pho l'ekicha; gudegbaa opu-ogu, epe e-gbu l'ekutara; bya echishia su: "A kwa ogu-echi ke Chipfu waa Gidiyonu-o!"

²¹ Onyenonu pfugbaaru l'ekiya nkiya; epe gbaphee eka ndu Midiyanu doru ono mgburugburu. Ndu Midiyanu ono l'ophu ye okpa l'oso; echi mkpu agba agbala. ²² Oo ya bu; epe gbuopho opu-ogu ukporo iri l'ise ono; Chipfu mee onyemonye, no l'odu ndu Midiyanu ono wata egbu nwibe iya ogu-echi. Ndu ojogu ono gbaru lashia mkpukpu Betu-Shita; l'uzo mkpukpu Zerera; mbu gbaa gbarwua oke mkpukpu Abelu-Mehola, no-kube mkpukpu Tabatu.

²³ Ndu Izurelu, shi l'okpa-ipfu Nafutali; me ipfu Asha; waa ipfu Manase be e kukotaru; epe chipyabe ndu Midiyanu. ²⁴ Gidiyonu ye ndu-ozii; epe je ezidzuru iphe, bu ndu bukota l'alii ubvu ubvu ndu Ifuremu g'ephe wufuta je agbabua ndu Midiyanu iphu l'enyimu Jiordanu; je akpakpo le mkpukpu Betu-Bara. Tobudu iya bu: e kukoo ndu Ifuremu l'ophu; epe wufuta je anochia enyimu Jiordanu; je akpaa le Betu-Bara. ²⁵ Oo ya bu; epe gude ndu-ishi ndu Midiyanu umadzu ebo. Epha ndu-ishi labo ono bu Orebu waa Zeyebu. Orebu

b'ẹphe gburu ẹ mkpuma Oṛẹbu; gbua Zeyẹbu l'ẹka aakuje mee ẹ mkpuma Zeyẹbu. Ẹphe nọdu achikpoephondu Midiyanu ono; bya apata ishi Oṛẹbu waa Zeyẹbu palataru Gidiyọnu l'ẹka ọ nọ l'azụ ẹnụmu Jiódanu.

8

Gidiyọnu alwụ ndu Midiyanu ọphu phọduru nu

¹ Tọbodu iya bụ; ndu Ifuremu sụ Gidiyọnu: “? Denu g’o gude i mee ya anyi ẹgube-a? Mbụ; ? denukpoo g’o gude ọphu i ti kuduru anyi teke i jeru etso ndu Midiyanu ọgu?” Ẹphe gbachae ya pho opfu agbagba ehuka ehuka.

² Gidiyọnu sụ phẹ: “?Denu iphe, mu gbẹ mee, ka ọphu unu meru shii? ?Ọ dū g’akpa mkpakwa akpuru vayinu kẹ ndu Ifuremu ta akadụ ree; eme l’akpuru vayinu kẹ Abiyeza l’ọphu?” ³ Chileke bẹ woru Oṛẹbu waa Zeyẹbu, bụ ndu-ishi ndu Midiyanu ye unu l’ẹka. ?Denu iphe, mu gbẹ mekpọ, ka ọphu unu meru shii?” O pfuchaephondu iphe ono; obu jizeta phẹ.

⁴ Gidiyọnu yee umadzu ukporo iri l’ise pho bya erwua ẹnụmu Jiódanu; bya aghabua ya aghabu. Teke ono bẹ ike bvushichakpowaru phẹ ree; ọle ẹphe achiepho ndu ohogu phẹ ono kpabẹ kpabẹ. ⁵ Ẹphe rwua mkpukpu Sukotu; ọ sụ ndu mkpukpu ono: “Jiko unu nunu ndu ojogu mu nri ẹ mbà atukwa phẹ atutu. Ọ kwa Zeba waa Zalumuna, bụ ndu eze ndu Midiyanu bẹ anyi achị ọso.”

⁶ No iya; ndu-ishi Sukotu ono su iya: “?Unu gudeakwanaru Zeba yee Zalumuna obu meru g’o gude anyi je anu ndu ojogu ngu nri?”

⁷ Tɔbudu iya bu: Gidiyonu su phe: “O dua ree; teke Chipfu woerupho Zeba yee Zalumuna ye mu l’eka be bu ogara-mbo, shi l’echiegu; waa obyambvu be mu e-gude lakashia anu unu alakashi.” ⁸ O bya agbe l’eka ono jeshia mkpukpu Peniyelu; bya eje arwokwa phe pho nno; ephe pfukwapho ge ndu Sukotu pfuru pho. ⁹ Oo ya bu; o su ndu Peniyelu: “Mu -lwu-kpee l’ogu ono lwajeepho alwalwa; be mu e-tsukposhi ulo-eli unu-a.”

¹⁰ Zeba waa Zalumuna be no le mkpukpu Kako ephe le ndu ojogu phe, du ukporo unu nemadzu l’unu iri l’esaa l’ukporo nemadzu iri, bukota ndu ojogu, e gbuphodoru le ndu ojogu, shi l’uzo enyanwu-awawa. Ndu ojogu ono be e gbuwaru ukporo unu nemadzu ugbo iri l’ise, bukota ndu pagbaa ogu-echi. ¹¹ Gidiyonu bya eje eshia uzo ndu ije eshije; l’uzo enyanwu-awawa mkpukpu Noba waa mkpukpu Jiogbeha; je etsoo ndu ojogu ono ogu le teke ephe tuzohuru eh. ¹² Eze ndu Midiyanu ono ephebebo, bu iya bu Zeba yee Zalumuna ye okpa l’oso; a chia phe je egude; bya edukaa ndu ojogu phe.

¹³ Gidiyonu, bu nwa Jiowashi lwajeepho ogu ono o shia uzo ubvu Heresu. ¹⁴ Oo ya bu; o gude nwokoro lanu, shi le mkpukpu Sukotu bya ajjahaa ya aji. Nwokoro ono deshiaru iya ephe ndu-ishi waa ndu bu ogerenya mkpukpu Sukotu; deta umadzu ukporo eto l’iri l’esaa. ¹⁵ Tɔbudu iya bu; Gidiyonu bya ejepfu ndu

mkpukpu Sukotu ono je asu phe: “Wakwa Zeba yee Zalumuna ba; mbu ndu ono, unu shi epfuru mu kwaphukwaphu su: ‘?Mu gudeakwanaru Zeba waa Zalumuna; meru g’o gude unu je anu ndu ojogu mu, ike bvushiru nri g’ephe ria-a?’ ” ¹⁶ No iya; o bya akpukoo ndu bu ogerenya mkpukpu Sukotu; gude ogara-mbo, shi l’echiegu; waa obyambvu gude nua phe aphu. ¹⁷ O bya etsukposhia ulo-eli ndu mkpukpu Peniyelu; bya egbushikwaapho ndu mkpukpu ono.

¹⁸ Tobudu iya bu; Gidiyonu bya ajia Zeba waa Zalumuna su phe: “?Bu egube ndu gunu be unu gbushiru l’ubvu Tabo?”

Ephe su iya: “?O kwa unwoke, dukotaepho g’unubedua; mbu l’onye ophu nonu duchaepho ge nwa onye eze.”

¹⁹ Gidiyonu su phe: “Ndu ono be bukotakwa unwune mu; mbu l’ephe bukota unwoke, ne mu nwushiru. Eshinu Chipfu no ndzu g’o no iya-a; be mu tege egbukwa unu ome unu doberu phe ndzu.” ²⁰ Oo ya bu; o su okpara iya, bu Jieta g’o gbushia phe. Ophu o dudu ike milia ogu-echi iya gbua; kele o bunukaru nwatanshii; ndzu nodu agu iya.

²¹ Tobudu iya bu; Zeba waa Zalumuna su iya: “Gbalihu; bya egbua anyi l’onwongu. Oo ge nwoke ha bu g’ike iya ahaje.” Oo ya bu; Gidiyonu zilihu; woru phe gbushia; bya anyafuchaa inya-kamelu phe iphe, e gude mee phe ona, bu iphe, e shi nyabechaa phe l’olu.

²² E mechaa; ndu Izurelu su Gidiyonu: “Buru Onye-ishi anyi; gu le nwa ngu; me nwanwa

ngu; eshinu o bu ngu dzotaru anyi l'eka ndu Midiyanu."

²³ Gidiyonu su phe: "Mu taa bukwaru onye-ishi unu; ophu nwa mu abukwaru onye-ishi unu. O kwa Chipfu a-buru Onye-ishi unu." ²⁴ O su phe: "Iphe lanu, mu arwo unu bu g'onyenonu nuchaa mu iphe-nchi, yi l'iphe, o kwataru l'okwata." Ndu Midiyanu eyeje iphe-nchi; noo kele ephe bu ndu ke Ishimelu.

²⁵ Ephe yee onu su: "Anyi e-gudekpoo ehutso nu ngu iya." Ephe bya eworu ekwa phushi l'ali; onyenonu wotachaa iphe-nchi, yi l'iphe, o kwataru l'okwata chie l'ekwa ono. ²⁶ Iphe-nchi mkpola-ododo ono, o suru g'ephe nu iya ono be erwa iya ha g'unu ekpa mkpola-ododo eno l'ukporo ekpa mkpola-ododo ise; a -gufukwa iphe, e gude eme ome mma; me iyagba-olu; me uwe uswe, ndu eze ndu Midiyanu eyeje; waa gwogirigwo, ndu eze ono nyabechaaru inya-kamelu phe l'olu. ²⁷ Gidiyonu gude iphe-nchi mkpola-ododo ono kputa uwe-ukuvu; dobe iya onu le mkpukpu iya ono, bu Ofura. Ndu Izurelu bya agwaahaa ya; gude pharwushiahaa onwophe. O bya aburu onya; nmata Gidiyonu yee ndibe iya.

²⁸ Oo ya bu; ndu Izurelu bya akapyabe ndu Midiyanu; ophu ndu Midiyanu egbelibaeduru ishi ozobaa. Le teke Gidiyonu no ndzu be ali ono bukotaru le nchi-odoo ukporo apha labo.

Anwuhu Gidiyonu

²⁹ Jieru-Balu, nwa Jiowashi bya alaa ibe iya je eburu. ³⁰ O nwutaru unwoke ukporo eto

l'iri; kele o luru unwanyi igwerigwe. ³¹ O nwekwarupho nwanyi, o to ludu okpobe alulu, bu le mkpukpu Shekemu. Yebedua nwutaru iya nwa nwoke lanu. Iphe, o guru nwata ono bu Abimeleku. ³² Gidiyonu, nwa Jiowashi nwuhu teke o kahwaru okpobe akahu. E lia ya l'ilu nna iya, bu Jiowashi le Ofura, bu iya bu mkpukpu ndu Abiyeza.

³³ Anwuhu, Gidiyonu anwuhu; ndu Izurelu dakobe wata apharwushi onwophe; mbu wata abaru Balu, nogbaa l'ali ono eja. Ephe woru Belu-Beritu dobe; o buru agwa phe. ³⁴ Ophu ephe anyataeduru Chipfu, bu Chileke phe ono, bu iya dzotakotaru phe l'eka ndu ohogu phe mg-burugburu egede ono. ³⁵ Ophu ephe emejeduru ndibe Jieru-Balu, bu iya bu Gidiyonu ree le ke ree ono, o mekotaru ephebe ndu Izurelu ono.

9

Ejo-idzu, Abimeleku chiru

¹ Tobudu iya bu; Abimeleku nwa Jieru-Balu gbeshi bya ejeshia le mkpukpu Shekemu l'ibe nwune ne iya phe; jekota l'iphe, bu ipfu ke ndu ne iya je asu phe: ² "Unu jikotakpoo iphe, bu ndu Shekemu su phe: '?Bu ole karu unu ree? ?Bu g'unwu Jieru-Balu umadzu ukporo eto l'iri ono buru onye-ishi unu; too ?g'onye lanu buru onye-ishi unu?' Ozo bu g'unu nyatakwapho le mu bu okpu, shi unu l'ehu waa mee unu." ³ Ndu ne iya ono je eworu iphe ono pfukotaru iphe, bu unwoke ndu Shekemu; o buru iphe, okpoma phe nataru bu g'ephe tsoru Abimeleku;

kele ephe pfuru su: “Oo nwune anyi be obu.”
⁴ Ephe bya anu iya ukporo mkpola-ochaa eto le mkpola-ochaa iri, shikota l'ulo agwa phe ono, bu Belu-Beritu. Abimeleku bya egude mkpola-ochaa ono buko ndu ogalemkpa waa ndu eme gaphu-gaphu-gaphu; ephe wuru tsoahaa ya. ⁵ O bya ejeshia l'ibe nna iya le mkpukpu Ofura; je egbushikota unwunna iya ono, bu iya bu unwu Jieru-Balu ono, du umadzu ukporo eto l'iri ono l'eli mkpuma lanu. Oo ephe Jiotalamu, bu iya kachakpo aburu nwata l'unwu Jieru-Balu ono be bu onye phoduru nu; kele o jeru edomia onwiya. ⁶ No iya; ndu Shekemu mekpoo ndu mkpukpu Betu-milo je atuko dzukobe l'upfu achi, no le mgboru itso, du nso, bvuru le Shekemu; woru eze mee Abimeleku.

⁷ Ge pfuerupho Jiotalamu iphe ono, ephe meru ono; o je enyihu mkpakponu ubvu Gerizimu; raaru phe iya arara su: “Unube ndu Shekemu; unu ngabekpodaru mu pho nchi-o; k'ophu Chileke a-ngabekwarupho unu nchi!” ⁸ Su-a; o nweru teke oshi gbeshikotaru jeshia ahoata oshi, a-buru eze phe. Ephe pfuaru oshi olivu g'o buru eze phe. ⁹ Oshi olivu su phe: ‘?Mu a-paru manu mu haa, bu iphe, eegudeje akwabeg Chileke me nemadzu ubvu bya eletaha oshi l'ophu enya?’ ¹⁰ Ephe bya epfukwaarupho oshi figu g'o buru eze phe. ¹¹ Oshi figu su phe: ‘?Mu a-paru eguru akpuru ono, mu amije ono, atsoje nmatu ono haa bya eletaaha oshi l'ophu enya?’ ¹² Tobudu iya bu; ephebe oshi ono bya asu vayinu g'o buru eze phe. ¹³ Vayinu su phe: ‘?Bu ge mu paru mee mu, emeje g'obu so Chileke waa nemadzu utso

ono haa bya eletaaha oshi l'ophu ɛnya?' ¹⁴ E mechaa; oshi ono g'ɛphe ha sɔ gɛ ɔgara-mbo bya aburu eze phe. ¹⁵ ɔgara-mbo sɔ phe: "Teke ɔ dɔ unu gɛ mu buru eze unu; unu wɔbata nɔ lɛ mkpula mu bya ezee ndzɔ; ɔ -dɔdu; g'ɔku shikwa lɛ mɔbe ɔgara-mbo bya ekepyashikota iphe, bɔ oshi sida, nɔkota l'úbvú Lébanonu!" "

¹⁶ Noo ya; Jíótamu sɔ phe: "ɔ -buru l'ɔo iphe, gbaru unu bɛ unu meru ono; mbɔ ɔ -buru l'ɔo ree bɛ unu meru ono; woru Abimeleku mee eze; mbɔ-a; ɔ -bukpooru l'ɔo iphe, dɔta adɔta bɛ unu meru Jieru-Balɔ yɛ ndibe iya ono; mbɔ ɔ -bukpooru l'ɔo ɛgube, ɔ gbaru g'unu mee ya ya bɛ unu meru iya ya ono; ¹⁷ mbɔ nna mu ono, lwuru unu ɔgu; tɔa ishi ndzɔ iya; dzɔta unu l'ɛka ndu Midiyanu ono; ¹⁸ bɛ ɔ gbɛchia rwua ntanɔ ɔwa; unu gbɛ tsopyabɛ ndu unuphu ibe nna mu ono; woru unwu iya ukporo umadzu ɛto l'iri gbushia l'eli mkpuma lanɔ. Unu bya eworu Abimeleku, bɔ nwatibe ohu, nna mu gbatarɔ agbata mee eze ndu Shɛkemu; kele ɔ bɔ nwune unu. ¹⁹ ɔ -buru l'ɔo iphe, gbaru unu bɛ unu meru ono; mbɔ ɔ -buru l'ɔo ree bɛ unu meru Jieru-Balɔ yɛ ndibe iya lɛ ntanɔ-a; gɛ Abimeleku bukwaru unu ɛhu-ɔtso; unubɛdua abukwarupho yɛbedua! ²⁰ Teke ɔ tɔ dɔdu; g'ɔku shikwa l'ɛhu Abimeleku bya ekepyashia unubɛ ndu Shɛkemu waa ndu Bɛtu-milo; g'ɔku shikwaphɔ l'ɛhu unubɛ ndu Shɛkemu; waa ndu Bɛtu-milo bya ekepyashia Abimeleku!" ²¹ Noo ya; Jíótamu pfuchaa nno; bya agbalaa lashia mkpukpu Biye je ebuwaruro l'ɛka ono; kele ɔotsu nwanna iya ono, bɔ Abimeleku ebvu.

22 Abimeleku buru onye-ishi ndu Ízurelu nọ apha ẹto; 23 Chileke zia ẹjo maa; o je anọdu l'echilabọ Abimeleku yẹle ndu Shẹkemu; ẹphe meahaaru Abimeleku ghelegheleghele. 24 O buru Chileke meru ge ndu Shẹkemu meje nno; g'ee-shi g'a pfua Abimeleku ugwo ẹjo-iphe ono, o meru unwunna iya ono; mbu g'a gwata iya ugwo ochi unwu Jieru-Balu, du umadzu ukporo ẹto l'iri; mbu unwunna iya ono, o gbushiru ono. Aagwatakwapọ ndu Shẹkemu, bu ndu yetaru Abimeleku njo ẹka g'o gbushia unwunna iya ono ugwo ochi phe. 25 Tobudu iya bu; ndu Shẹkemu bya eye ndu jeru akwakaaru iya l'eli ubvu, nogbaa l'eka ono g'ẹphe mekata iya. O nodu abujeru onye ghatakporu l'uzo ibe iya ono; ẹphe anaa ya nfu. E je agbaaru Abimeleku ama.

26 Noo ya; Galu, bu nwa Ebedu gbeshi duta unwunna iya; ẹphe wuru jeshia Shẹkemu. O jerwua; ndu Shẹkemu woru onwophe ye iya l'eka okpobe eyeye. 27 Epe bya awufu jeshia l'egu je awokoo akpuru vayinu l'opfu-vayinu phe. Epe wokobechaa ya; bya azoshia mee l'akpuru vayinu ono wata abo obo-iphe l'ulo agwa phe. Epe nodu eri; bya angu; teme epe nodu epfubyishikwapọ Abimeleku. 28 Tobudu iya bu; Galu nwa Ebedu su: “?Bu onye be Abimeleku bunu-a? ?Bukpoo gunu aa-kpata g'anyiye ndu Shẹkemu nodu iya l'eka? ?O kwa l'oo nwatibe Jieru-Balu be o bu? Mbu ?to budu Zebulu be etsota iya nu l'aburu ishi? Unu jechiaru ndu Hamo, bu iya bu nna ndu Shẹkemu ozi! ?Bu gunu aa-kpata g'anyi bya ejeahaaru

Abimeleku ozi? ²⁹ O dū g'a sūkwanu lẹ ndu-a bẹ nọ mu l'ẹka! Mu gege emegheana kẹ Abimeleku. Mu gege asū Abimeleku g'ọ kwakọbe ndu ojọgu iya gude lufuta!”

³⁰ No iya; Zebulu, bụ onye-ishi mkpukpu ono nūmaepho iphe ono, Galu nwa Ebedu pfuru ono; ọ voru oku wua ẹhu. ³¹ O bya ezia ndu-ozi iya lẹ mpya; ẹphe je ezia Abimeleku ozi sū iya: “Lenu; Galu nwa Ebedu bẹ yele ndu unuphu ibe pẹ byaakwaru Shekemu. Ẹphe tukoakwa iphe, bụ ndu mkpukpu-a kpalia g'ẹphe tso ngu opfu. ³² Oo ya bụ; iphe, ii-me nta-a bụ g'i gbeshi l'enyashi; waa ndu ophu gu l'ẹphe nọ; je akwakachaa l'ime ẹgbudu. ³³ O -beepho l'utsu; mbu mẹ ẹnyanwu -waepho; unu gbeshi je etsoo mkpukpu ono ogu. Galu yee ndu ono -byatashia g'ẹphe tso ngu ogu; mee pẹ g'eka ha ngu.”

³⁴ Oo ya bụ; o be l'enyashi; Abimeleku yele ndu ojọgu iya l'ophu kee onwophe uzi ẹno; je akwakachaa l'aguga mkpukpu Shekemu. ³⁵ No iya; Galu nwa Ebedu gbeshi je apfuru l'onu ẹka eeshije abahu lẹ mkpukpu ono. Abimeleku yele ndu ojọgu iya shichaa l'ẹka ono, ẹphe domishiru onwophe ono wufuta. ³⁶ Galu humae pẹ pho; ọ rashiaru Zebulu sū: “Lenu-o! Ndu nemadzū shikwa l'eli úbvú awu abya!”

Zebulu sū iya: “Oo onyonyo úbvú ono bẹ i humaru; ọ gbẹ duchaa ngu nū g'ọ bụ nemadzū.”

³⁷ Galu bya epfukwaa ya pho ozo sū: “Ophu lekpodapho; ndu nemadzū shikwa l'echilabo mkpukpu eje abya; teme ọ dukwarupho ndu ophu shi l'uzo upfu achi ndu jibya eje abya.”

³⁸ Zebulu sù iya: “?Denuhunu onu ono, i shi apashi-a; mbu onu, i gude su: ‘?Bu onye be Abimeleku bu ke g’anyi bya ejeahaaru iya ozi-a?’ ?Tobunaa ndu-a be i shi epfutoshi-a? Jenu je adatso phe ugu!” ³⁹ No iya; Galu bya eduta ndu Shekemu; ephe je etsoo Abimeleku ugu. ⁴⁰ Abimeleku chia phe oso; ephe ye okpa l’oso. Igwerigwe ndu ojogu ke Galu dachaa iko; mekachaa iphe-ehuka. Ephe daepo popoo jasù l’onu eka eeshije abahu le mkpukpu ono. ⁴¹ E mechaa; Abimeleku lashia mkpukpu Aruma je anodu. O buru Zebulu be chifuru Galu yele unwunna iya ono le Shekemu. ⁴² Tobudu iya bu; o bya ebekwa le nchitabohu iya; ndu Shekemu bya ejeshikwaa l’egu; e je epfuaru iya Abimeleku. ⁴³ Oo ya bu; o chita ndu ojogu iya; woru phe kee uzi eto; ephe je akwakachaa l’egbudu l’egbudu. O leepho enya; huma ge ndu Shekemu shi le mkpukpu ono awu abya; o gbeshi datso phe ugu; woru phe gbushia. ⁴⁴ Tobudu iya bu; Abimeleku waa ndu ophu yee ya swi bya awufu-kebe jeshia l’ibiya k’onu eka eeshije abahu le mkpukpu ono. Uzi labo k’ophuu wufu je adatso ndu Shekemu ndu ophu no l’egu pho ugu; woru phe gbushia. ⁴⁵ Le mboku ono l’ophu be Abimeleku lwukotaru ugu le mkpukpu ono. O lwuta iya; gbushia ndu bu iya nu; mebyishikota mkpukpu ono; bya eworu unu ghakota iya.

⁴⁶ Ndu bu l’ulo-eli ono, no le Shekemu ono numapho iphe ono; ephe wubakota l’ime eka a kpushiru ike l’eze ulo agwa, bu Elu-Beritu. ⁴⁷ No iya; ama bya agbaaru Abimeleku le ndu bu l’ulo-

eli Shẹkemu bẹ kùkobekwaru l'ẹka lanu. ⁴⁸ Oo ya bu; Abimeleku waa ndu ophu yee ya swi bya ejeshia ubvu Zalumonu. Epe rwua l'eka ono; Abimeleku bya egude ogbunku gbukwoshia nku; chita tua l'ukuvu. O bya asu ndu ono, yee ya swi ono: "Ngwa! Iphe, unu humaru, mu meru; unu mee egube ono!" ⁴⁹ Noo ya; onyenonu bya ebukoo nku; vuta tsoru Abimeleku. Epe je eworu iya doo l'ime eka ono, a kpushiru ike ono; mbu l'eli ndu no l'ime iya ono; woru oku tua ya. Oku tsua ulo-eli ono; kegbushikota ndu no iya nu, rwuru unu umadzu labo l'ukporo umadzu iri; unwoke me unwanyi. Epe nwushihukota.

Anwuhu Abimeleku

⁵⁰ E mechaa Abimeleku bya ejeshia mkpukpu Tebezu; je ekephee mkpukpu ono; lwuta iya. ⁵¹ Ole o nwekwanuru ulo-eli, a kpushiru ike no le mkpukpu ono. O buru l'eka ono be unwoke me unwanyi; mbu ndu bukota le mkpukpu ono gbaru la je anodu. Epe gu-chishikota onwophe l'ime iya; bya awuru lashia l'ime mkpotsu ulo-eli ono. ⁵² Abimeleku bya ejeshia l'ulo-eli ono g'o tsoo ndu no ya nu ogu. O rwutashia onu-abata ulo-eli ono ntse g'o tufu iya oku; ⁵³ nwanji lanu l'ime ndu ono, no l'ulo-eli ono pataepho nggu-mkpuma uswe woru tua Abimeleku l'ishi; woru iya okpu ishi tupyashia atupyashi. ⁵⁴ O bya ekukebe nwokorobya, achijeru iya ngwogu iya su iya: "Mita-kebe ogu-echi ngu gbugbua mu; k'ophu epe taa anodudu epfu su: 'O kwa nwanji be gburu iya nu.' " Oo ya bu; onye-ozu iya ono wota ogu-echi sa ya; o nwuhu. ⁵⁵ Ndu

Ízurelu húmaepfo lẹ Abimeleku bẹ nwùhuwaru nu; onyenonu tugbuchaa lashia unuphu.

⁵⁶ O buri egube ono bẹ Chileke shiru gwata Abimeleku ugwo ejo-iphe ono, o meru nna iya ono; mbu k'unwunna iya, du ukporo eto l'iri, o gbushiru ono. ⁵⁷ Chileke bẹ mekwarupho g'ejo-iphe, ndu Shekemu meru ono tukoru phe l'ishi. Onu ono, Jiótamu nwa Jieru-Balu turu bẹ mechaa nwua l'ehu phe.

10

Tola; onye-ikpe ndu Ízurelu

¹ No iya; gẹ Abimeleku buchaaru onye-ikpe ndu Ízurelu; bẹ onye ozo shi l'okpa-ipfu Isaka byaru afuta g'o dzota ndu Ízurelu. Epha nwoke ono bu Tola; nwa Puwa; mbu nwanwa Dodo. Eka o bu bu lẹ mkpukpu Shamiru, no l'alì úbvú úbvú ndu Ifuremu. ² O buri onye-ikpe ndu Ízurelu ukporo apha l'apha eto; bya anwuhu; e lia ya lẹ mkpukpu Shamiru.

Jiayi; onye-ikpe ndu Ízurelu

³ Jiayi, bu onye Giladu bya etsota iya; bya ekpeeru ndu Ízurelu ikpe ukporo apha l'apha labo. ⁴ O nwuta unwoke ukporo l'iri. Unwu iya ono nodu agbakota nkafu-igara l'ehu l'ehu. Onye ophu nonu; nwechaaru mkpukpu nkiya l'alì Giladu. Mkpukpu ono g'o hakota bẹ aza Havotu-Jiayi byasu lẹ ntanu. ⁵ E mechaa; Jiayi nwuhu; e lia ya lẹ mkpukpu Kamonu.

Jiefuta; onye-ikpe ndu Ízurelu

⁶ Ndu Ízurelu bya emee ẹjo-ememe l'anya Chipfu ọzobaa; mbụ baaharu agwa Balu ẹja; mę Ashitoretu; mę agwa ndu Aramu; mę agwa ndu Sayidonu; mę agwa ndu Mowabu; mę agwa ndu Amonu; waa agwa ndu Filisitayinu. Ẹphe paru Chipfu haa; ophu ẹphe ta abajeeduru iya ẹja. ⁷ Oke ẹhu-eghu Chipfu dapfuta nu ndu Ízurelu. Chipfu nwuru phe ye ndu Filisitayinu waa ndu Amonu l'eka. ⁸ Ẹphe mekpaa phe ẹhu; gwee phe arakabya l'apha ono. Apha iri l'esato be ẹphe mekpakotaru ndu Ízurelu, bukota l'uzo ẹnyanwu-awawa ẹnyimu Jiordanu ẹhu; mbụ l'alị Giladu, no l'alị ndu Amoru. ⁹ Ndu Amonu bya adafu azu ẹnyimu Jiordanu azu iya ophu g'ẹphe je adatso ndu Jiuda; mę ndu Benjaminu; waa unwu Ifuremu ọgu. Oo ya bu; ndu Ízurelu nodunu l'oke iphe-ẹhuka.

¹⁰ Tọbudu iya bu; ndu Ízurelu bya araku Chipfu; su iya: "Anyi mesweakwaru ngu; kele anyi paru gube Chileke anyi haa; je abaphea-haarụ agwa, bu Balu ẹja." ¹¹ No iya; Chipfu su phe: "?Tọ bunu mu-a be dzotarun unu l'eka ndu Ijiputu; mę ndu Amoru; mę ndu Amonu; mekpoo ndu Filisitayinu?" ¹² Mękpoo teke ndu Sayidonu; mę ndu Amaleku; waa ndu Mawonu shi akpaya unu ishi ono be unu rakuru mu ge mu gbaaru unu mkpu; mu dzota unu l'eka phe. ¹³ Unu gbẹ paru mu haa je abaphea-haarụ agwa ẹja. Eshinu o du nno be mu ta abyakwa adzotabaa unu ozo. ¹⁴ Unu tugbuwa jenu araku agwa, bu ophu unu hataru g'ẹphe bya adzota unu teke unu no l'iphe-ẹhuka!" ¹⁵ Tọbudu iya

bụ; ndu Ízurelu sụ Chipfu: “Anyi meakwaru iphe-ẹji. Mee anyi iphe, dukpoe ngu phọ ree. Ọle-a; jiko dzọnaa anyi ntanu-a.” ¹⁶ Tọbudu iya bụ; ẹphe wofukọta agwa ndu ọhozo ono, ẹphe dobechaaru ono; bya abaaharu Chipfu ẹja. Aphụ, ndu Ízurelu nọ ono rwutabe iya l'ẹhu k'ọphu ọ tọ dọedu ike taa nshi.

¹⁷ No iya; a bya ekukọo ndu Amọnu k'ọgu; ẹphe je anmaa anmanma ọgu l'alị Giladu. Ndu Ízurelu bya edzukọbekwapho; je anmaa anmanma ọgu lẹ mkpukpu Mizupa. ¹⁸ No iya; ndu-ishi Giladu sụ nwibe phẹ: “Onye vukpọoru ọzo je etsoo ndu Amọnu ọgu bẹ bụ onye ono a-buru onye-ishi ndu Giladu l'ọphu.”

11

¹ Jiẹfuta, bụ onye Giladu bẹ bụ onye ojọgu ike dọ; ọle ọ bụ nwatibe nwanyị ụkpara. Nna Jiẹfuta bẹ bụ Giladu. ² Unyomu Giladu bẹ nwushiru iya unwu. O be teke unwegirima unyomu iya ono byaru evushichaa; ẹphe chifu Jiẹfuta sụ iya: “I tii ketakwa oke l'unuphu ibe anyi; kele ọo nwanyị ọzo bẹ nwuru ngu nụ.” ³ Tọbudu iya bụ; Jiẹfuta gbafuru unwune iya ono gbaru lasha alị Tobu je eburu. O buru l'ẹka ono; ndu ọgalemkpa wụ-pfuta iya bya etsoahaa ya.

⁴ A nonyaa; ndu Amọnu bya etsoo ndu Ízurelu ọgu. ⁵ Ọ buru teke ono, ndu Amọnu tsoaharu ndu Ízurelu ọgu ono bẹ ndu bụ ọgerenya ndu Giladu tugburu je ekua Jiẹfuta l'alị Tobu; ⁶ sụ iya: “Bya bya aburu onye-ishi anyi; k'ọphu anyi a-dụ ike datsoo ndu Amọnu ọgu.”

⁷ Jiẹfuta sụ phẹ: “?Unu ta akponuru mu-a ashi; chifu mu l'unuphu ibe nna mu? ?Bụ gụnu kparụ iphe, ọ bụ nta-a, unu nọ l'iphe-ẹhuka-a bẹ unu choaharu mu bya?”

⁸ Ndu bụ ọgerenya Giladu sụ: “Ọo ya meru g'o gude anyi byapfutashia ngu-a; k'ophu ii-tSORU anyi je etsoo ndu Amonu ọgu; l'i buru onye-ishi ndu bukọta l'alị Giladu.”

⁹ Ọo ya bụ; Jiẹfuta sụ phẹ: “Unu -duta mu lashia azụ gẹ mu je etsoo ndu Amonu ọgu; ?mu a-buru-a onye-ishi unu k'eviya mẹ Chipfu mee mu lwụ-kpee phẹ?”

¹⁰ Ndu bụ ọgerenya Giladu ono sụ iya: “Ọ buẹpho Chipfu bẹ bụ onye-ekebe anyi lẹ ngu. Anyi ee-mejeẹpho iphe, i pfuru.” ¹¹ Tọbudu iya bụ; Jiẹfuta bya etSORU ndu bụ ọgerenya ndu Giladu ono. Ndu ono mee ya onye-ishi waa onye-ishi ojogu phẹ. Jiẹfuta nọdu lẹ Mizupa pfushikọta iphe ono, o pfuhawaru ono l'iphu Chipfu.

¹² No iya; Jiẹfuta bya ezia ndu-ozì g'ẹphe je ajia eze ndu Amonu sụ iya: “?Bụ gụnu bẹ anyi meru ngu, meru g'o gude i byatashia anyi etso ọgu l'alị anyi?” ¹³ Eze ndu Amonu bya ezia ndu ono, Jiẹfuta ziru ozi ono; sụ phẹ: “Iphe, kparụ iya nụ bụ lẹ teke ndu Ízurelu shi l'alị Ijiputu wufuta bẹ ẹphe natakọtaru mu alị mu shita l'enyimu Anonu jeye l'enyimu Jiaboku; mbụ jasụ l'enyimu Jiódanu. Unu nụ-phuchaa mu alị ọbu azụ nta-a lẹ nchì-odoo.”

¹⁴ Jiẹfuta bya ezikwaa ndu-ozì iya ọzo g'ẹphe je eziphu eze ndu Amonu ono azụ; ¹⁵ sụ iya: “Waa

iphe, Jiefuta pfuru baa: Ndu Ízurelu ta natakwaru alì ndu Mówabu; ophu ephe anataduru ndu Amonu alì phe. ¹⁶ Teke ndu Ízurelu shi l'alì Ijiputu lufuta be ephe shiru uzo echiegu lufu le Eze-enyimu Uswe-uswe; gbè l'eka ono bahu le mkpukpu Kadeshi; ¹⁷ O buru le Kadeshi ono be ndu Ízurelu no zia ndu-ozì g'ephe je epfuaru eze ndu Edomu su: 'Jiko g'anyi shijana-a alì ngu ghata.' Ophu eze ndu Edomu ta angaduru phe nchi. Ephe byakwapho eje ezia eze ndu Mówabu egube ono; yebedua jikakwapho. Oo ya bu; ndu Ízurelu kwaa le Kadeshi. ¹⁸ Tobudu iya bu; ephe wulihu kwaseru echiegu; tsoru alì ndu Edomu waa ke ndu Mówabu gbaa mgburugburu; bya alufuta l'uzo enyanwu-awawa alì ndu Mówabu ono. Ephe je adoru l'azu enyimu Anonu azu iya ophu; ole ephe ta abahuduru l'alì ndu Mówabu; kele oo enyimu Anonu bu oke alì ndu Mówabu ono. ¹⁹ Ndu Ízurelu byakwa ezia ndu-ozì g'ephe je ezia Sihonu, bu eze ndu Amoru, mbu onye bu le mkpukpu Heshibonu su iya: 'G'anyi shijana-a alì ngu ghata lashia alì nkanyi.'

²⁰ "Ophu Sihonu ekwekwapho ge ndu Ízurelu ghata l'alì iya. O bya ekukobekota ndu nkiya l'ophu; ephe wufu je adoru le mkpukpu Jiahazu; ephe le ndu Ízurelu lwugbabe ogu. ²¹ Tobudu iya bu; Chipfu, bu Chileke ke ndu Ízurelu woru Sihonu; me ndu nkiya l'ophu ye ndu Ízurelu l'eka. Ephe lwu-kpee phe. Ndu Ízurelu nakota alì ndu Amoru, bu ndu bu l'eka ono. ²² Ephe lwutakota alì ndu Amoru; e shi le Anonu jasu

1) Jiaboku; mekwapho; a -gbe l'echiegu jasu
 l'enyimu Jiordanu. ²³ Oo ya bu; eshi ophu Chipfu,
 bu Chileke ke ndu Izurelu chishichawaru ndu
 Amoru; bya eworu ali phe nu ndu nkiya, bu ndu
 Izurelu; ?o gbaru g'a nu-phu ngu iya azu ozo
 to? ²⁴ ?Tobudu iphe, agwa ngu, bu Kemoshi
 nuru ngu bu ophu ii-kwe aka? Nokwapho
 g'anyibedua e-nweru iphe, Chipfu, bu Chileke
 anyi nuru anyi g'anyi nweru bu ono. ²⁵ ?I ka
 eze ndu Mowabu, bu Belaku nwa Zipo ree? ?O
 tsoru ndu Izurelu opfu? To; ?ephe l'iya lwuru
 ogu? ²⁶ Ndu Izurelu bukotaru le Heshibonu;
 me Arowa; me nwa mkpukpu, no-pheru phe
 mgburugburu; mekwapho le mkpukpu, nochaa
 l'aguga enyimu Anonu ukporo apha iri l'ise
 ophu. ?Bu gunu meru iphe, i ti natachadaru ali
 obu le teke ono? ²⁷ Mbdua te emeswekwaru
 ngu. Oo gubedua, byaru etsoaha mu ogu be gbe
 achu mu opfu. Ole-a; ge Chipfu, bu onye-ikpe,
 bukafukwa opfu ono, duru ndu Izurelu yee ndu
 Anonu le ntanu." ²⁸ Ole eze ndu Anonu be ta
 ngakpodaru nu nchi l'ozi ono, Jiefuta ziru g'e zia
 ya ono.

Jiefuta alwu ndu Anonu

²⁹ Tobudu iya bu; Unme Chipfu bya eji Jiefuta
 eh. O bya eshijaa ali Giladu; waa ali ndu
 Manase; bya eshijaa mkpukpu Mizupa, no l'ali
 Giladu. O buru le mkpukpu Mizupa ono be o gbe
 jeshia etso ndu Anonu ogu. ³⁰ Jiefuta bya ekwee
 Chipfu ukwe; su: "O -buru l'i woru Anonu ye mu
 l'eka; ³¹ be iphe, vukpo uzo gbafuta l'ulo mu bya
 agba mu ndzuta me mu -lwu-kpee ndu Anonu

Iwaje; be a-buru ke Chipfu. Mu e-gudeele iya pho gwee ngweja-akpo-oku.”

³² Tobudu iya bu; Jiefuta bya atugbua jeshia etso ndu Amonu ogo. Chipfu woru phe ye iya l'eka. ³³ E -shi le mkpukpu Arowa jasu l'uzo, eeshije abahu le mkpukpu Minitu be o mekotaru mkpukpu ukporo umerekete; mbu gbua phe pyaapyaas jasu le mkpukpu Abelu-Keramimu. Tobudu iya bu; ndu Izurelu bya akapyabe ndu Amonu.

Jiefuta eworu nwatibe iya ke mgboko anu Chipfu

³⁴ No iya; Jiefuta Iwarutaepho unuphu ibe iya le mkpukpu Mizupa; a bya ele enya; nwatibe iya ke mgboko nodu akuwa nkwa; ete ebvu; agba iya ndzuta. Nwamgboko ibe iya ono bu nwa lanu, o nwutaru kpeekpu. Mbu l'a -gufu iya be o to nweedu nwa nwoke; ozo nwa nwanyi ozo o nwutabaaru. ³⁵ Jiefuta humae ya pho; o woru uwe iya lajashia; bya arashia: “Oowa-e! Nwada mu-e! I mewaru aphu tsoru mu; mbu mu bya aburu onye gba eka nwa; kele ukwe-iphe, mu kweru Chipfu be mu ta adukwa ike ge mu te emeru iya ya.” ³⁶ Nwa iya nwanyi ono su iya: “Nnana mu! Iphe, i pfuru Chipfu be i pfiwaru iya. Mee mu egube ono, i kwetawaru ukwe iya; eshinu Chipfu mewaru g'i gwata ndu ohogu ngu bu ndu Amonu ugwo iphe, ephe meru.” ³⁷ Su iya: “Ole-a; iphe, ii-mekpoeru mu pho kpoloko bu g'i haaru mu onwa labo ge mu le ndu onya mu swiru je l'ubvu; je araa ekwa; kele mu ta abyadu aluru ji.” ³⁸ Tobudu iya bu; o su iya:

“Jenu.” O dufu iya; o je l'úbvú je anọo ọnwa labọ yẹle ụnwumgboko, bu ọnyà iya. Ẹphe raa ẹkwa ẹkele ọ tọ byadu aluru ji. ³⁹ Ọnwa labọ ono -bvụepho; ọ lapfushia nna iya. O woru iya mee ẹgube ono, o kweru ukwe iya ono; ọphu yẹ nwoke akwajẹduru jasuru ọ nwuhu. Ọo ya bu; ọ bya aburu omelali, du l'alị ndu Ízurelu; ⁴⁰ k'ọphu bu l'aphagapha be akatikpo ụnwumgboko ndu Ízurelu awufuje je anọo ujiku ẹno gude nyata nwada Jiẹfuta ono; mbụ Jiẹfuta, onye Giladu ono.

12

Jiẹfuta yẹle ndu Ifuremu

¹ Tọbodu iya bu; ndu Ifuremu bya edzukọbe k'ọgu; bya adafu azu ẹnyimu Jiódanu azu iya ọphuu jeshia le mkpukpu Zafonu je ajia Jiẹfuta; su iya: “?Bu gunu meru iphe, i jeru alwu ndu Amonu; ọphu i kuduru anyi? Anyi ejeakwa atu ulo ngu oku g'o tsupyabe gubedua.”

² Jiẹfuta su phe: “?O kwa le mu le ndibe mu be yele ndu Amonu shi nodu l'ukukanyi; mu kua unu; ọphu unu ekwedu bya adzo mu l'eka phe. ³ Mu humaepho l'unu ta agbaduru mu mkpu; mu woru ishi ndzu mu tua; dafu azu ẹnyimu Jiódanu je adatso ndu Amonu ọgu. Chipfu meekwapho; mu lwu-kpee phe. ?Buhunu ole be unu gbẹ nta-a byatashia mu etso ọgu?” ⁴ Tọbodu iya bu; Jiẹfuta bya ekukọbe ndu Giladu; ẹphe je etsoo ndu Ifuremu ono ọgu. Ndu Giladu lwu-kpee ndu Ifuremu; kele ndu Ifuremu suru phe: “Unube ndu Giladu; unu bu nlwamulwa, bya

eburu l'echilabo ndu Ifuremu waa ndu Manáse.”
⁵ Ndu Giladu je akwachishichaa eka eerwuje
 erwurwu l'enyimu Jiódanu lufu le mkpukpu
 Ifuremu. O nodu abujeru teke onye Ifuremu,
 nahuru nu gbarwutaru l'eka ono; osu phe:
 “Ge mu ghataeshikwa.” Ndu Giladu ono aja
 ya su iya ?I bu onye Ifuremu? Teke onye
 obu suru: “Waawaa.” ⁶ Epe asu iya: “O
 du ree; pfulukwa: ‘Shiboletu.’ ” O nodu
 abujeru; onye jeru iya ekuku; o -kuswee ya kua
 ya “Siboletu”; epe egude iya woru gbua l'eka
 ono, eerwuje enyimu Jiódanu erwurwu ono. Le
 teke ono be e gburu ndu Ifuremu, du ukporo unu
 nemadzụ ise l'unu ise.

⁷ Noo ya; Jiefuta ono, bu onye Giladu ono; buru
 onye-ikpe ndu Izurelu apha ishi. O nwuhu; e lia
 ya le mkpukpu lanu, no l'ali Giladu obu.

Ibuzanu; onye-ikpe ndu Izurelu

⁸ Onye ozo, byaru aburu Onye-ishi, ndu
 Izurelu ge Jiefuta nwuhuchaaru ono be bu
 Ibuzanu, onye mkpukpu Betulehemu. ⁹ O
 nwutaru ukporo unwoke l'unwoke iri; waa
 ukporo unwany l'unwany iri. Unwumboko
 ibe iya ono be o keshichaaru ji l'ipfu ozo. Unwu
 iya unwoke ono be o jekwarupho alutachaaru
 unwumboko l'ipfu ozo. Ibuzanu buru ishi
 ndu Izurelu apha esaa; ¹⁰ nwuhu; e lia ya le
 mkpukpu Betulehemu.

Elonu; onye-ikpe ndu Izurelu

¹¹ Ibuzanu buchaaru ishi; Elonu, bu onye
 Zebulun bya aburu ishi ndu Izurelu apha iri.

¹² Tọbudu iya bụ; Elọnu, bụ onye Zebulọnu bya anwụhu; e lia ya lẹ mkpụkpu Ajialọnu l'alị ndu Zebulọnu.

Abụdonu; onye-ikpe ndu Ízurelu

¹³ Noo ya; Elọnu nwụhuchaa; Abụdonu; nwa Hilelu onye shi lẹ mkpụkpu Piratọnu bya aburu onye-ikpe ndu Ízurelu. ¹⁴ O nwutaru ụkporo unwoke labo; bya enweru unwu nwanwa, du ụkporo unwoke l'unwoke iri. Ephe nweru ụkporo nkafu-igara eto lẹ nkafu-igara iri. Abụdonu buri onye-ikpe ndu Ízurelu apha esato. ¹⁵ Abụdonu; nwa Hilelu, bụ onye Piratọnu nwụhu; e lia ya lẹ Piratọnu, nọ l'alị ndu Ifuremu l'alị úbvú úbvú ndu Amaleku.

13

Anwunwu Samusin

¹ Ndu Ízurelu bya emee iphe-eji l'enya Chipfu ozobaa. Oo ya bụ; o nwuru phe ye; epehe nọo ndu Filisitayinu l'eka ụkporo apha labo.

² O nweru nwoke lanu, bụ onye mkpụkpu Zora, epha iya bụ Manowa. O bụ onye shi l'ipfu ke Danu. O luru nwanyi; ophu nyee ya ono ta atsudu ime; o nodu ophu o to nwutaduru nwa.

³ Tọbudu iya bụ; ojozi-imigwe, ke Chipfu bya ehee nwanyi ono l'iphu; su iya: "Lenu; nta-a be i tti tsudu ime; ophu o dudu nwa, i nwutaru; ole ii-tsuta ime; nwua nwa nwoke. ⁴ Nta-a bu g'i kwabeekwapho enya g'i ti ngu mee; ophu i ngukwa iphe, atsu atsutsu; ophu i rikwa iphe, aaso nsọ; ⁵ kele ii-tsuta ime nwua nwa nwoke.

G'a ta kpukwa iya ishi; noo kele ọo-buru onye duru Chileke iche e -shi l'ephō. Ọo-wata adzọ ndu Ízurelu l'ẹka ndu Filisitayinu.”

⁶ Tọbudu iya bụ; nwanyị ono tugbua je epfuaru ji iya sụ iya: “Onye kẹ Chileke byapfutakwaru mu. Ọ dọephō akpabiri g'ojosi-imigwe kẹ Chileke. Ọle mu ta jikwanuru iya ẹka o shi; ọphu ọ kọkwanuru mu ẹpha iya. ⁷ Ọle ọ suru mu lẹ mu a-tsuta ime; nwua nwa nwoke. Lẹ nta a bẹ bukwa gẹ mu ba angushi mее; ọphu mu angukwa iphe, atsụ atsutsu; ọphu mu erikwa iphe, aasọ nsọ; kele nwata ono a-buru onye duru Chileke iche e -shi teke ọ nọ l'ephō jeye mbọku, ọo-nwuhu.”

⁸ Tọbudu iya bụ; Manowa bya epfuru nụ Chipfu sụ: “Nnajiuphu; jiko menaa g'onye kẹ Chileke ono, i ziru; ọ byapfuta anyi ono lwaphuta azu ọzo bya egoshi anyi g'anyi e-shi hee nwata ono, aa-nwu onoya.” ⁹ Chileke numa iphe ono, Manowa pfuru ono. Ojosi-imigwe kẹ Chileke ono byapfuta nwanyị ono ọzo lẹ teke ọ nọ l'egu; ọle Manowa, bụ ji iya bẹ yele iya ta atukoduru nọdu l'ẹka ono. ¹⁰ Nwanyị ono gbaephō ẹgwegwa je epfuaru iya ji iya sụ: “Lenu-o! Nwoke ono, byapfutajeru mu mbọku phọ-a bẹ rwuakwaru ọzo!”

¹¹ Manowa gbalihu tsoru nyee ya ono jeshia. Ọ bya abyapfuta nwoke ono; ọ jia ya sụ: “?Bụ ngu bẹ pfujeru opfu nụ nyee mu-a?”

Ọ sụ iya: “Ọo mu.”

¹² Ọo ya bụ; Manowa sụ iya: “Teke iphe ono, i pfuru ono vukotaerupho; ?denu ẹgube anyi ee-

gude hee nwata ono? Teme; ?bu gunu a-buru ozi iya?"

¹³ Ojozi-imigwe ke Chipfu ono su iya: "Ge nyee ngu mekotaepho iphe, mu pfuru iya ono. ¹⁴ G'o to rikwa iphe, shikpo l'akporu vayinu; ophu o ngukwa mee; ophu o ngukwa mee, atsụ atsutsu; ophu o rikwa iphe, aaso nsọ. Iphemiphe ono, mu tushiru iya ekemu iya ono be oo-mekota."

¹⁵ Manowa su ojozi-imigwe ke Chipfu ono: "Jiko g'anyi sede nu ngu gi nodu g'anyi gude nwa mkpi meeru ngu nri."

¹⁶ Ojozi-imigwe ke Chipfu ono su: "Unu e-sedekpokwa mu; ole mu tee erikwa nri unu. Ole o -buru l'oo ngweja-akpo-oku be unu eme g'unu gwee; unu gweru iya nu Chipfu." Ophu Manowa amakwanu l'oo ojozi-imigwe ke Chipfu be o bu.

¹⁷ Tobudu iya bu; o bya aja ojozi-imigwe ke Chipfu ono; su iya: "?Iza gunu; k'ophu anyi a-kwabekwanu ngu ubvu me iphe ono, i pfuru ono vukotaepho?"

¹⁸ Ojozi-imigwe ke Chipfu ono su iya: "?Bu gunu kparu iphe, iji mu iphe, mu aza? Epha mu dakikwaru uche amadu."

¹⁹ Tobudu iya bu; Manowa bya akputa nweghu yekobe iya ngweja-nri; bya egweshiru iya Chipfu l'eli mkpuma. Manowa yee nyee ya nodukpoepho ele enya; Chipfu mee iphe, du biribiri; ²⁰ noo kele oku gbanwuhurupho l'eli eka ono, eegweje aja ono; kpumia ala l'igwe; ojozi-imigwe ke Chipfu ono bahu l'iroku ono. Manowa yee nyee ya humaepho iphe ono; ephe dachaa woru iphu kpube l'ali. ²¹ Ojozi-imigwe

ke Chipfu ono mechaa; ophu o chafutabaeduru l'iphu Manowa yee nyee ya. Manowa gbete teke ono maru l'oo ojozi-imigwe ke Chipfu be o bu.

²² O su nyee ya ono: "Anyi a-nwuhukwa; noo kele o Chileke be anyi humaru ono!"

²³ Nyee ya ono su iya: "Ome o du Chipfu g'ogbua anyi egbugbu me o togo natadunu ngweja-akpo-oku waa ngweja-nri ono, anyi nuru iya ono; ophu o togo goshidunu anyi iphemiphe-a; ophu o togo pfukwarupho anyi iphemiphe-a, o goshiru anyi-a."

²⁴ Nwanyị ono mechaa bya atsuta ime; nwua nwa nwoke; bya agua ya Samusinu. Nwata ono bya evuta; Chipfu kebe iya l'oma. ²⁵ No iya; Unme Chipfu bya emeahaa ya ire l'ehu le teke o no le mkpukpu Mahane-Danu, no le mgbaka mkpukpu Zora waa mkpukpu Eshutolu.

14

Samusinu alu nwamgboko Filisitayinu

¹ O be ujiku lanu; Samusinu jeshia mkpukpu Timuna. O buru l'eka ono be o humaru nwamgboko Filisitayinu lanu. ² O bya alarwua unuphu; je asu ne iya yee nna iya le ya jekwaru mkpukpu Timuna; ya huma nwamgboko ndu Filisitayinu lanu. Su g'e jekwa alutaru iya ya g'o buru nyee ya.

³ Nna iya waa ne iya ono su iya: "? To dukpoda nwanyi, du ngu ree l'ime unwada abubu ngu phe; ozoo le ndibe anyi? Gubedua; ? bu l'ibe ndu Filisitayinu, bu ndu te ebuduru ubvu ono be ii-jeshia alu nwanyi?"

Ọle Samụsinu sụleru-a nnana iya g'ọ je alụtaru iya ya; l'ọo ya bụ nwamgbọko ama iya mma shii.

⁴ Ọphu nna iya yẹe ne iya ta amadụ l'ọo Chipfu bẹ iphe ono shi l'ẹka; mbụ lẹ Chipfu achọ g'oo-shi mekata ndu Filisitayinu; kele teke ono bẹ ndu Ízurelu nọ l'ẹka ndu Filisitayinu.

⁵ Tọbudu iya bụ; Samụsinu yẹe nna iya waa ne iya tuko swịru jeshia Timuna. Ẹphe rwuẹpho l'opfu-vayinu, nọgbaa lẹ Timuna ono; a bya l'amaru; nwa oduma lufutawa; aba hanyihanyi azo-kube Samụsinu. ⁶ Unme Chipfu bya abya iya l'ẹhu k'ike. Ọ zuepho oduma ono gburumu; gude ẹka labushia ya g'onye labushiru nweghu nshii. Ọphu o pfuduru nna iya; waa ne iya iphe ono, o meru ono.

⁷ Ọo ya bụ; ọ bya atugbua jepfushia nwanyị ono, oopfu k'alululu ono; yẹe ya bogbabechaa; nwanyị ono nọdu ama iya mma shii. ⁸ E mechaa g'a nọnyaaru; ọ laphushia azu je iya aluta; ọ swiba gẹ ya huma odzu oduma pho. Ọ huma l'ẹnwu gbawaru iya ite; manụ-ẹnwu duwa iya. ⁹ O gude ẹka kükuta iya ritsoru ọzo. O jepfuẹpho nna iya waa ne iya; ọ nụ phe; ẹphe ria. Ọphu o pfukwanuru phe l'ọo l'odzu oduma pho bẹ ọ kükutaru manụ-ẹnwu obu.

Ílú, Samụsinu turu

¹⁰ Tọbudu iya bụ; nna iya bya ejeshia g'ọ huma nwanyị ono. Samụsinu bya eshia nri ekele-nwanyị l'ẹka ono; kele ọo g'unwoke, alu nwanyị l'ẹka ono emejekpọo bụ ono. ¹¹ No iya; ẹphe humaepho Samụsinu; ẹphe duru umadzu

ụkporo l'iri yeru iya g'ẹphe l'iya tuko nọdu.
¹² Samụsinu bya asụ phẹ: “Gẹ mu tukupodarupho unu ílú lanụ. O -bụru l'unu kọru mu iphe, o bụ l'ime abalị ẹsaa, a nọ lẹ nri-a bẹ mu a-nụ unu uwe mgbalanụ ụkporo l'iri waa uwe, dị iche iche ụkporo l'iri. ¹³ Teke o bụ l'unu ta akọtaduru iya; unu anụ mbèdua uwe mgbalanụ ụkporo l'iri waa uwe, dị iche iche ụkporo l'iri.”

Ẹphe sụ iya: “Tụeshiduru anyi ílú ngu obu; g'anyi nụma.”

¹⁴ O bya atụaru phẹ iya sụ:

“Iphe, erije iphe bẹ iphe, eeri eriri shi lufuta.
 Iphe, nweru okpehu bẹ iphe, atso utso shii lufuta.”

A nọ abalị ẹto; ophu ẹphe adudu ike kọo iphe, ílú ono bụ.

¹⁵ O be lẹ mbọku k'ẹno; ndu ono sụ nyee Samụsinu ono: “Dee ji ngu edede g'ọ karụ anyi iphe, ílú ono bụ; odumeka bẹ anyi e-tsukwa ngu oku; gụ lẹ ndibe nna ngu. ?Bụ iphe, i yeru anyi g'anyi bya bụ g'ị nata anyi iphe, anyi nweru tọo?”

¹⁶ Tọbudu iya bụ; nyee Samụsinu ono bya anọdu iya l'iphu raahaa ẹkwa; sụ iya: “Mu dị ngu ashị! I ti yeduru mu obu ilile! I turu ndibe anyi ílú; ophu ị tị kaduru mu iphe, ílú obu bụ!”

O sụ iya: “Mu ta akọduru iya nna mu; ozoo ne mu; ?denu gẹ mu e-shi bya akọ-chiaru iya gubedua?” ¹⁷ Nwanyị ono rakọta ẹkwa ujiku ẹsaa, ẹphe nọ lẹ nri ono. Oo ya bụ; o be lẹ mbọku k'ẹsaa ono; o woru iya kọoru iya; kẹle oopfukpoeru iya phọ g'ọ kọoru iya ya. Yẹbedua je eworu iphe, ílú ono bụ kọoru ndibe phẹ ono.

18 Ẹnyanwu bya arība lẹ mbọku k'ẹsaa ono; ndu mkpukpu ono sụ Samụsinu:

“?Bụ gụnu bẹ ka manụ-ẹnwu ụtso?

?Bụ gụnu bẹ ka oduma ọkpehu?”

Samụsinu sụ pẹ:

“Ọ tọ bụ l'unu kularu l'ẹka ada-eswi mu nọ;

bẹ unu tege adukwa ike kọo iphe, ilu mu ono bu.”

19 Tọbudu iya bụ; Unme Chipfu bya iya l'ẹhu k'ike; ọ buru iya eje mkpukpu Ashikelonu je echigbushia ukporo umadzu l'umadzu iri; natakota pẹ iphe, ẹphe nweru. Ọ chiru uwe pẹ, dụ iche iche chiru nụ ndu ono, kọtaru ilú ono, ọ turu ono. O gude ẹhu-eghu, enwu iya phuruphuru l'ẹhu lashia ibe nna iya. ²⁰ Ẹphe woru nyee Samụsinu ono kee ọnyà Samụsinu, yeru iya ẹka lẹ teke ọolu nwanyi ono.

15

Samụsinu atụ ọku l'iphe, ndu Filisitayinu meberu l'alị

¹ O rwuerupho teke eebuje witi; Samụsinu kputa nwada egbu; kpapfushia nyee ya ono. Ọ rwua ọ sụ ọgo iya ono: “Mu e-jepfuakwa nyee mu lẹ mkpuru nkiya.”

Ọphu nna nyee ya ono te ekwedu g'ọ bahu l'ime ọlo; ² sụ iya: “Mu maru lẹ nyee ngu ono bẹ dụ ngu ashị ọkpobe adudu. Ọo ya meru g'o gude mu kee ya ọnyà ngu.” Sụ iya: “?Nwune iya kẹ nwata ta akadụ iya ama mma tọ? Dutachinaa yẹbedua.”

³ Samụsinu sụ phẹ: “Nta bẹ mu nweru ẹka mu a-gbabe ọkpa meshia ndu Filisitayinu iphe ike; ọphu ụta taa dudu mu iya.” ⁴ Ọo ya bụ; ọ tughua je akpukoo uphega le ndzu; kputa phe ukporo iri l'ise; gude phe l'ite-odzu ligbabechaa phe ẹbo ẹbo. Ọ bya eworu ọwá lipyabechaa phe le mgbaka ite-odzu ono. ⁵ Ọ bya anwuru ọku yekota l'ọwá ono; parụ uphega ono hashichaa ẹka l'ẹka witi ndu Filisitayinu nọ. Ọ tukota ọku le witi, e gbushiwari egbushi; me ndu ọphu e teke egbushidu egbushi; je akpaa l'opfu-vayinu mekpoo oshi olivu phe.

⁶ Tọbudu iya bụ; ndu Filisitayinu sụ: “?Bụ onye meru iphe ọwa?”

A sụ phẹ: “L'oo Samụsinu, bụ ọgo nwoke Timuna bẹ meru iya nụ; kele e dutaru nyee ya kee ọnyà iya.” Ọo ya bụ ndu Filisitayinu tughuepho je egude nyee Samụsinu ono; waa nna iya kpoo ọku.

⁷ Samụsinu sụ phẹ: “Eshinu unu gbẹ mee egube-a bẹ mu ta abyadu aha unu; jasụ mu emelataada unu!” ⁸ O tsoo phe ọgu ehuka ehuka; gbushia ndu du igwerigwe l'ime phe. O mechaa bya atughua je anodu l'ogba, nọ l'oke mkpuma le mkpukpu Etamu.

⁹ Tọbudu iya bụ; ndu Filisitayinu wufu je adoru l'alì Jiuda k'ogu; nochaa jasụ le mkpukpu Lehi. ¹⁰ Ndu Jiuda jja sụ: “?Bukwa ole bẹ unu byaru anyi etso ọgu?”

Ephe sụ: “Anyi byaru g'anyi gude Samụsinu melata iya ugwo iphe, o meru anyi.” ¹¹ Ọo ya bụ; unu nemadzu esaa l'ukporo iri, shi l'alì

Jiuda zafu jepfushia Samusinu l'ogba, no l'oke mkpuma le mkpukpu Etamu ono je asu iya: “? Bu egube gunu be i meru anyi owana? ?Ti madu l'anyi no l'eka ndu Filisitayinu?”

O su phe: “Oo iphe, ephe meru mu be mu melataru phe.”

¹² Ephe su iya: “Anyi byakwaru g'anyi kee ngu egbu; kputa je anu ndu Filisitayinu.”

Samusinu su phe: “Unu riaru mu angu l'unu te egbudu mu l'onwunu.”

¹³ Ephe su iya: “Waawaa; anyi te egbukwa ngu. A kwa egbu be anyi e-ke ngu kpoloko; kputa ngu je anu phe.” Ephe bya egude okpukpu ophuu labo kee ya egbu; bya akpufuta iya l'oke mkpuma ono.

¹⁴ O rwutashia le mkpukpu Lehi; ndu Filisitayinu turu oko kpua ya; gbapfushia ya. Unme Chipfu bya iya l'ehu k'ike. Okpukpu ono, e kekotaru iya l'eka ono ribushihuephoo g'eba-oghu, e gude oku dabua; egbu ono, e kekotaru iya ono gbabushihukota iya l'eka dashihu. ¹⁵ O humaekwapho okpu-agba nkapfu-igara, du ophuu ophuu; o dzukotae l'iya pho; gude iya chigbushia unu umadzu labo l'umadzu ukporo iri. ¹⁶ Tobudu iya bu; Samusinu su:

“Okpu-agba nkapfu-igara be mu gude mee;

ephe kuta l'ikpo l'ikpo;

mbu; l'oo okpu-agba nkapfu-igara

be mu gude gbushia unu umadzu labo l'umadzu ukporo iri.”

¹⁷ O pfuebechaa nno; o tuphaa okpu-agba nkapfu-igara ono; woru eka ono gube “Ramatu-Lehi”, bu iya bu “obvudu okpu-agba”.

¹⁸ Tòbudu iya bụ; ẹgu-mini bya agushiaha ya ike; ọ raku Chipfu; sụ iya: “Ọo ngu bẹ meru g'onye-ozì ngu lwụ-kpe k'ọphu parụ ẹka ẹgube-a. Nta; ?bụ-chia ẹgu-mini bẹ a-gbẹ gbua mu; mu adaba ndu ono, bụgba akpapyị ono l'ẹka?”

¹⁹ Chileke woru ẹka dụ nsụda lẹ mkpụkpu Lehi gbawaa; mini soshiaha ya. Samụsinu bya angụchaa mini ono; ike bya adụ iya; obu guzeta iya. O woru ẹka ono gube Enu-Hakore, bụ iya bụ “obvu-mini onye rakuru nù”. Obvu-mini ono nọpho lẹ mkpụkpu Lehi byasụ ntanụ.

²⁰ Samụsinu bụru Onye Ikpe ndu Ízurelụ ụkporo apha lẹ teke kẹ ndu Filisitayinu ono.

16

Samụsinu aphọkata ọguzo, eeshije abahụ lẹ mkpụkpu Gaza

¹ Samụsinu bya ejee mkpụkpu Gaza; je ahụma nwanyị ụkpara; o jee yee ya kwaa. ² Tòbudu iya bụ; a bya epfuaru ndu Gaza sụ: “Samụsinu bẹ byakwaru l'ẹka-a!” Ọo ya bụ; ndu mkpụkpu ono je asọ-pee ẹka ono nọdu kwabekotaru iya l'enyashi ono l'ophu; nọdukota ngguing-guji l'ọnu ẹka eeshije abahụ lẹ mkpụkpu ono kwabekotaru iya l'enyashi ono l'ophu asuje: “L'ìphóró nchi-abọhu bẹ anyi e-woru iya gbua.”

³ Samụsinu zẹ l'ẹka ono jeye l'echilabọ abalị. Ọ gbẹ teke ono gbalihu je aphọkata mgbo-ọguzo, e yeru l'ọnu-abata mkpụkpu ono; phọkatachaa yee itso labọ, e gude yee ọguzo ono; mbụ phọta mẹ mgbo-ígwè g'ọhakota dẹ l'ukuvu. O

vutakọta iya je enyihu mkpakponu úbvú ono, nọ gha iphu lẹ mkpukpu Hẹburonu ono.

Samusunu yẹe Delayila

⁴ Tọbodu iya bu; a nonyaepho; ọ bya eje eyee nwan yi, bu lẹ nsuda Sorẹku obu. Epha nwan yi ono bu Delayila. ⁵ Ndu-ishi ndu Filisitayinu bya ejepfu nwan yi ono je asu iya: “Dejibekpọe ya phọ g'o goshi ngu ẹka ọkpehu iya ono, parụ ẹka ono nọkpoo; dekwaa ya phọ g'ọ karu ngu g'anyi e-shi gude iya kee ya ẹgbu; bya akapyabe iya.” Ephe su nwan yi ono l'ephe a-nuchaa ya ẹkpa mkpọla-ọchaa iri lẹ nanu l'ẹhu l'ẹhu.

⁶ Ọo ya bu; Delayila jepfu Samusunu je asu iya: “Jiko kanuru mu iphe, meru g'o gude ẹjo ọkpehu du ngu ẹgube-a; iikafuaru mu ẹgube ee-me gudekpọo ngu kee ngu ẹgbu; mee ngu ewere.”

⁷ Samusunu su iya: “Ọ -buru l'e gude ọkpukpu ẹsaa, a swiru k'ọphúú, ta akpọhuduru nku kee mu ẹgbu; be mu a-byaepho adu arwuhu; mu abya adu g'onye ọzo du.”

⁸ Tọbodu iya bu; ndu-ishi ndu Filisitayinu bya achie Delayila ọkpukpu ẹsaa, a swiru k'ọphúú, ta akpọhuduru nku; o gude iya kee ya ẹgbu.

⁹ A chiru nemadzu domishia l'ime mkpuru; ephe nodu kwagebe akwagebe. O kebechaa ya ya; ọ su iya: “Samusunu! Ndu Filisitayinu abyakwa ngu egude!” Ọ gbabushia ọkpukpu ono g'ọ bu ẹba-oghu be e gude ọku dabua. Ọo ya bu l'a ta cho-vuduru ẹka ọkpehu iya nọ.

10 No iya; Delayila sụ Samụsinu: “Ichi mu eswe; bya adzụ-pheru mu ụka. Jiko kanuru mu g'ee-shikpọ kee ngu ẹgbu.”

11 O sụ iya: “Oo e -gude eri òphúú, ta adudu iphe, e mejewaru iya kee mu pyataa; mu abya adu arwuhu; du g'onye ozo du.”

12 Oo ya bu; Delayila bya achita okpukpu òphúú gude kee ya ẹgbu. O nweru unwoke, domiru onwophe l'ime mkpuru; kwaberu iya. O sụ iya: “Samụsinu! Ndu Filisitayinu abyakwa ngu egude!” O lwubilihu; woru okpukpu ono, o keru iya l'eka ono gbabushia g'ọ bu ẹba-oghu. 13 Delayila bya asụ Samụsinu: “Ime teke i shikwanu chita mu eswe; bya adzụ-pheru mu ụka. Kanuru mu ẹgube ee-shikpọ kee ngu ẹgbu obu.”

O sụ iya: “O -buru l'i hakaharu ẹgbushi mu-a ụzo ẹsaa; bya eworu iya ganga l'iphe, eegudeje ekwe ẹkwa; mbu kwepyabechaa ẹgbushi mu ono l'iphe iigudeje ekwe ẹkwa ono; bya egude ngga, i gudeje ekwe ẹkwa kpopyabeshia ya ike l'iphe iikweje ẹkwa ono be mu a-bya adu arwuhu; mbu bya adu g'onye ozo du.”

14 Tobudu iya bu; Samụsinu kuerupho mgbenya; Delayila bya aloa ẹgbushi ono, a hakaharu uzi ẹsaa ono kwepyabe l'oghu, e gudeje ekwe ẹkwa; bya egude ngga, e gude ekwe ẹkwa kpopyabeshia ya ikike. O bya asụ iya: “Samụsinu! Ndu Filisitayinu abyakwa ngu egude!” O zilihu le mgbenya, ooku; mi-lita ngga ono; waa iphe, e gudeje ekwe ẹkwa; me oghu, e gudeje ekwe ẹkwa ono. 15 O sụ iya: “?Denu g'ishi sụ l'i yeru mu obu l'ebe abụ l'obu ngu no l'eka

mu nọ? Ọwaa kwewa ugbo ẹto, i chikọtachaaru mu eswe; ọphu i kwedu kọoru mu ẹka ọkpehu ngu ono, parụ ẹka ono nọkpoo.” ¹⁶ Tọbudu iya bụ; ọ tų-chinyaa ya nchị; epfupheru iya iphe ono mbọkumboku; mbụ pfutabe iya k'ọphu bụ l'ike bvụchaaru Samụsinu bvụ ẹsha iya. ¹⁷ Ọo ya bụ; ọ bya eworu obu iya pfukọtaru iya; sụ iya: “A ta adajẹduru mu akwọ l'ishi; kele mu shi l'ẹpho ne mu bụru onye duru Chileke iche.” Sụ iya: “Ọ -bụru l'a kpụshiru mu ishi; ike mu alufu mu l'ẹhu; mu abya adu arwuhu; mbụ dụ g'onye ọzo mmanu.”

¹⁸ Delayila maerupho l'o pfuwaru iya obu iya; o zia ozi g'e je ezia ndu-ishi ndu Filisitayinu ono; sụ phẹ-a: “Unu lwafua azu ọgiya-a l'o pfugbuwaru mu iphemiphe.” Ọo ya bụ; ndu-ishi ndu Filisitayinu gude okpoga ono, ẹphe kweru iya ukwe iya ono byatashia. ¹⁹ Ọ bya emee Samụsinu ọ nọdu iya l'utapfu kuru mgbenya. O kua nwoke lanu; ọ bya akpushia ya ẹgbushi iya ono, a swingashiru uzi ẹsaa ono. Ọ kpushichaa ya ya; Delayila kapyabe iya; ọkpehu iya ono phefuwa iya l'ẹhu. ²⁰ Tọbudu iya bụ; ọ sụ iya: “Samụsinu! Ndu Filisitayinu abyakwa ngu egude!” Ọ bya etehu lẹ mgbenya ono gbẹ rịa sụ: “Gẹ mu bya emee gẹ mu emejehawaa; mu a-nyikofu nweru onwomu.” Ọphu ọ tọ madu lẹ Chipfu bẹ pawaru iya haa. ²¹ No iya; ndu Filisitayinu bya egude iya; woru iya ẹnya swoshia; kpuru iya jeshia mkpukpu Gaza. Ẹphe bya ekee ya ẹgbu; woru ẹgbirigba onyirubvu tua ya; kputa iya ye lẹ mkporo o je egweaha ereshi l'ulo mkporo. ²² A nonyaa ẹgbushi, nọ iya

l'ishi ono bya erwutaaha ọzo g'a kpushicharu iya ya ono.

Anwuhu Samusunu

²³ Ndu-ishi ndu Filisitayinu bya edzukọbe g'ẹphe gwee ngweja, parụ ẹka nụ agwa pẹ, bụ iya bụ Dagonu; tekwaaphọ ẹswa; kele ẹphe epfu sụ: “Agwa anyi bẹ wowaru onye ọhogu anyi, bụ Samusunu ye anyi l'ẹka.” ²⁴ Ndu ono hụmaerupho Samusunu; ẹphe wata etu agwa pẹ ẹpha; asuje: “Agwa anyi bẹ wowaru onye ọhogu anyi ye anyi l'ẹka; mbụ onye ono meru; alị anyi bụru mkpurupyata ono; mbụ onye bụ iya gbushiru igwerigwe l'ime anyi ono.”

²⁵ Ẹmereme jiẹ pẹ phọ ẹhu; ẹphe tushia ụzu; sụ: “G'e dufutaedurunu anyi Samusunu g'o meeru anyi iphe, ezi ọnochi.” Ọo ya bụ; a bya edufuta iya l'ulo-mkpọro; ọ bya emeahaaru pẹ iya. O be teke ẹphe meru iya ọ pfuru lẹ mgbaka itso, gudegbaa ụlo ono; ²⁶ Samusunu pfiaru nwokoro, sekpu iya l'ẹka sụ: “Meekwa mu gẹ mu mevuchaa itso ono, gudechaa ụlo ono k'ọphu bụ lẹ mu a-daphube iya.” ²⁷ Ụlo ono bẹ unwoke mẹ unwanyi jiru ejiji tsua ẹrupfu. Iphe, bụ ndu-ishi ndu Filisitayinu g'ẹphe ha bẹ nọkota l'ẹka ono. L'eli ụlo ono bẹ unwoke l'unwanyi, nọ iya nụ rwuru unu ẹsaa l'ukporo iri, bụ ndu nọkota ele Samusunu l'ẹka oomeru pẹ iphe, ezi ọnochi ono.

²⁸ Tọbudu iya bụ; Samusunu bya epfuru nụ Chipfu sụ iya: “Gube Nnajiuphu, bụ Chipfu; nyatanu mu! Gube Chileke; jiko menaa g'ike dufua mu ugbo lanu-a; k'ọphu mu e-gude ugbo

lanu-a gwata ndu Filisitayinu ugwo enya mu ephenebo-a.”²⁹ No iya; Samusinụ bya aworu eka l'itso labo, bu iya gude ulo ono. O bya azu-beshichaa ya eka ike; mbu zu-be ophu no iya l'ekutara; bya azube ophu no iya l'ekicha.³⁰ Samusinụ bya asu: “Ge mu le ndu Filisitayinu tukowaro nwushihukota!” O bya atsu-rweta; gude ike iya l'ophu nwubekota l'itso labo ono; ulo ono daa; tpyabekota ndu-ishi ono; me ndu ozo nokota l'ime ulo ono. Oo ya bu le ndu Samusinụ gburu le teke o nwuhuru be ka igwerigwe eme le ndu ophu o gbushiru teke o no ndzu.

³¹ Tobudu iya bu; unwunna iya waa ndibe phe tugbua je apata iya. Ephe je eworu iya lia le mgbaka mkpukpu Zora waa mkpukpu Eshutolu l'ilu Manowa, bu nna iya. Samusinụ be kperu ikpe le Izurelu ukporo apha.

17

Mayika agwo obvu

¹ O duru nwoke lanu, epha iya bu Mayika, shi l'alì ubvù ubvù ndu Ifuremu. ² O nonyaepho o su ne iya: “Eka mkpola-ochaa iri le nanu ngu ono, e wotajerupho; mbu mu numajeru eka iitu onye wotaru iya nu onu ono be bukwa mu gude iya; mbu l'oo mbedua be wotaru iya nu.”

Ne iya ono su iya: “Ge Chipfu kebekwa ngu l'oma; nwa mu!” ³ O bya eworu unu mkpola-ochaa labo l'ukporo mkpola-ochaa iri l'ise ono nu-phu ne iya azu. Ne iya ono su: “Mkpola-ochaa, shikota mu l'eka be mu tukowaru doberu

Chipfu iche gę nwa mu gude iya meta ntękpe, a pyiru apyipyi; waa ọbvụ, a kpuru akpukpu. Oo ya bụ lę nta-a bę mu a-nụ-phu ngu iya azu.”⁴ Oo ya bụ; ọ bya eworu mkpọla-ọchaa ono nụ-phukọta ne iya ono azu; ne iya ono ye ęka lę mkpọla-ọchaa ono wota iya ukporo mkpọla-ọchaa iri je achie onye akpuje mkpọla-ọchaa. O gude iya kputa ntękpe; waa ọbvụ. E je eworu iya dobekọta l'ulo Mayika.⁵ Mayika nweru ọlo-nshi; bya enwekwarupho uwe-ukuvu; mękwapho ọbvụ ọzobaa. O woru onye lanu l'unwu iya unwoke mee onye agwaję iphe.⁶ Teke ono bę ndu Ịzurelu eshidu nweru ndu eze; onyemonye nọdu anọduje eme g'ọ du iya.⁷ Tọbudu iya bụ; o duru nwokorọbya lanu, bụ onye Lívayi, shi lę mkpukpu Bętulehemu, nọ l'alị Jiuda. O shi buru l'echilabọ ndu ipfu Jiuda.⁸ Nwoke ono lufu lę mkpukpu ono tugbuja jeshia achọ ęka ọzo, oo-buru. O jenyaa bya abahu ibe Mayika l'alị úbvú úbvú ndu Ifuremu ono.⁹ Mayika jia ya sụ: “?Bụ awe bę i shi?”

Ọ sụ iya: “Mu bụkwa onye Lívayi. Mu shi lę Bętulehemu, nọ l'alị Jiuda; mu nọdu achọ ęka mu e-buru.”

¹⁰ Tọbudu iya bụ; Mayika sụ iya: “Gę mu lę ngu bunuru; g'i buru nna mu waa onye a-nọduje agwaru mu iphe. Mu a-nuje ngu mkpọla-ọchaa iri l'apha; akporu ngu uwe; bya azukwa ngu pho lę nri.”¹¹ No iya; onye Lívayi ono kweta gę yęe nwoke ono buru. Nwokorọbya-a bya adu Mayika g'ọ bụ onye lanu l'unwu iya.¹² Tọbudu iya bụ; Mayika bya emee onye Lívayi ono onye agwajęru iya iphe; ọ bya aburu onye gwaaharu

iya iphe; buwaruroo ya l'ibe Mayika. ¹³ Oo ya bu Mayika pfua su: "Nta-a be mu makporu le Chipfu ee-me g'iphe duru mu le ree; eshi ophu onye Lívayi buwa iya agwajeru mu iphe."

18

Ndu Danu achọ alì, ephe e-buru

¹ Teke ono be ndu Ízurelu te nwedu onye eze. O buru teke ono be ipfu Danu shi achọ eka ephe e-buru; kele o tọ dudu alì, a heru phe, g'ọ buru oke alì phe l'echilabọ okpa-ipfu ndu Ízurelu. ² Oo ya bu; ndu Danu ono bya ezia ndu ojogu umadzu ise, shi le mkpukpu Zora waa mkpukpu Eshutolu g'ephe je anwua ngge l'alì ono; maru g'ọ gbaru. Ndu ono be nọ-chikotaru enya unuphu phe g'ọ ha. Ephe su phe g'ephe tugbuwa je anwua ngge l'alì ono. Ndu ono jerwua l'alì úbvú úbvú ndu Ifuremu; bya abahu l'ibe Mayika je akwaa akwakwa l'enyashi ono. ³ Ephe nọ-kubeepho ibe Mayika ntse; ephe numa oluopfu nwokorobya, bu onye Lívayi pho; bya amamobeerupho l'oo ya be epfu opfu. Oo ya bu; ephe bahu l'eka ono; je ajia ya su: "?Bu onye du ngu bya l'eka-a? ?Bu gunu be iime l'eka-a? ?Bu gunu meru iphe, i nọ l'eka-a?"

⁴ O bya edoshikotaru phe iphe, Mayika meshikotaru iya; su phe: "Mayika be butaru mu ebuta ge mu buru onye agwajeru iya iphe."

⁵ Tọbudu iya bu; ephe su iya: "Jiko jitaeduru anyi Chileke g'anyi maru ije anyi-a; ?oo-nweru-a ishi?"

⁶ Onye uke ono sụ phẹ: “Unu jee lẹ chiriiri werere. Chipfu bẹ tɔwaru unu ụzo l'ije unu ono.”

⁷ Tɔbudu iya bụ; ụmadzu ise ono tughua bya ejerwua mkpukpu Layishi. Ẹphe rwua l'eka ono bya ahuma gẹ ndu bu iya nụ tɔsaru ẹhu. Ẹphe bukpọephọ nwajii; nweru onwophe gẹ ndu Sayidonu bu; kele ọ tọ dudu onye-ishi, emekpa phẹ ẹhu l'alị ono m'ilile. Ẹphe bukwapho ndu Sayidonu ụzenya; ophu ọ dudu ndu ọzo, ẹphe l'ẹphe emegbaa. ⁸ Ẹphe bya alaphu azụ lẹ Zora; mẹ lẹ Ẹshutolu. Unwunna phẹ jia phẹ sụ: “?Denu g'unu jeru iya?” ⁹ Ẹphe sụ: “Unu wulihu g'anyi je etsoo phẹ ọgu; kele anyi humawaru l'alị obu bẹ dụ rengurengu. Mbụ; ?unu nọkwadua gbụligbuli? Unu te ejekwa anmarwube k'eye alwuta alị ono. ¹⁰ Teke unu rwuerupho ẹka ono bẹ unu a-huma gẹ ndu bu iya nụ tuzoshihukotaru ẹhu; humakwapho g'alị ono ha kẹ phorokotokongu. Chileke woakwaru alị ono ye unu l'eka; mbụ alị, ta adudu iphe, dụ lẹ mgboko-a duru ophu dụ iya ụko.”

¹¹ Tɔbudu iya bụ; unu unwoke lẹ unwoke ụkporo iri, bụ ndu ipfu Danu ono bya akwaa ngwogu shi lẹ Zora mẹ Ẹshutolu wufu jeshia. ¹² Ẹphe jenyaa; ẹphe je adoru lẹ mgboru mkpukpu Kiriyatu-Jiarimu, nọ l'alị Jiuda. Ọo ya meru iphe, ụzo ẹnyanwu-arịba Kiriyatu-Jiarimu aza Mahane-Danu, bụ iya bụ “odu Danu” byasụ ntanụ-a. ¹³ Ọ bụru ẹka ono bẹ ẹphe shi jeshia l'alị ụbvú ụbvú ndu Ifuremu; bya awuba ibe Mayika.

Ndu Danu apata obvu Mayika

14 Tòbudu iya bụ; ùmadzu ise ono, jeru anwúa ngge l'alì ndu Layishi ono pfiaru ùnwunna p̄hẹ ono sù: “?Unu maru l'ùlo-a, nòkota ẹgube-a bẹ o nweru uwe-ukuvu; waa ọbvụ unuphu; m̄kwapho nt̄kpe, a pȳiru apȳipyi; waa ọphu a kp̄uru akp̄ukpu nọgbaa ya n̄? Nta-a b̄akwaaro g'unu; maru iphe, unu ee-me.” 15 Oo ya bụ; ẹphe sw̄iba l'ẹka ono; bah̄u l'ùlo ọphu nwokorọbya b̄u onye Lívayi ono bu l'ibe Maȳika. Ẹphe bya ekele iya ekele. 16 Ndu Danu ono, d̄u ùnu nemadz̄u l'ùkporo iri ono, b̄ukota ndu kwar̄u onwoph̄e ngw̄ogu ph̄o t̄uko pf̄ukotar̄u l'ònu ọguzo. 17 Ùmadzu ise ph̄o, jejeru anwúa ngge l'alì ono ph̄o bah̄u l'ùlo nshi ono je apata nt̄kpe, a pȳiru apȳipyi ono; waa uwe-ukuvu ono; waa ọbvụ unuphu ono; m̄ nt̄kpe, a kp̄uru akp̄ukpu ono. Onye agwaj̄e iya n̄ pf̄uru l'ònu ọguzo yele ùnu ùmadzu ùkporo iri ono, kwar̄u onwoph̄e ngw̄ogu ph̄o.

18 O be teke ndu ono bah̄uru l'ùlo Maȳika je ach̄ikoo nt̄kpe ono, a pȳiru apȳipyi ono; waa uwe-ukuvu ono; m̄ ọbvụ unuphu ono; m̄kpoo nt̄kpe, a kp̄uru akp̄ukpu ono; onye ono, agwaj̄e iphe ono j̄ia p̄hẹ; sù: “?B̄u ḡunu bẹ unu eme ẹgube ono?”

19 Ẹphe sù iya: “Dobekwa ọnu doo. Te epfukwa m̄ akp̄uru opfu lan̄. Bya etsoru anyi g'ì b̄uru nna anyi waa onye a-n̄odu agwaj̄eru anyi iphe.” Sù iya: “?O ka ngu ree g'ọ b̄uru unuphu onye lan̄ bẹ ì-n̄odu agwaj̄eru iphe; eme lẹ g'ì gwaj̄eru ipfu waa ndu unuphu ndu Ízurelu iphe?” 20 Tòbudu iya bụ; ẹhu tsọahaa onye agwaj̄e iphe ono nt̄matu. O bya ewota

uwe-ukuvu ono; waa ọbvụ unuphu; mę ntekpe, a pyiru apyipyi ono tsoru ndu ono.

²¹ Ẹphe bya adakọbe ọ bụru pẹ atugbu. Ẹphe kparu unwegirima vuru ụzo; mę iphe-edobe pẹ; mękpoo iphemiphe, ẹphe nweru enweru.

²² Ẹphe jeribeerupho ụzenya; mę a -gbẹ l'ibe Mayika; a bya ekukọo ndu bunyabẹ Mayika; ẹphe zefu je agbabua ndu Danu iphu. ²³ Ẹphe wata echi mkpu eekpu ndu Danu. Ndu Danu ghakọbe sụ Mayika: “?Bụ gụnu eme ngu meru g'o gude ị chita nemadzụ byatashia anyi etso ọgu?”

²⁴ Ọ sụ pẹ: “Unu gwetarụ ọbvụ mu; bya eduta onye agwajeru mu iya nụ tugbua.” Sụ pẹ: “?Bụ gụnu bẹ bụ iphe, mu nwebakwadaaru ọzobaa? ?Denuhunu g'unu gbẹ jiahaa mu sụ: ‘?Bụ gụnu bẹ e me ngu nu?’ ”

²⁵ Ndu Danu ono sụ iya: “Ta byakwa apfuru g'anyi lẹ ngu saka iya; ọdumeka bẹ ndu obu ọku a-byakwa ngu l'ẹhu; gụ lẹ ndibe ngu e-tuphaa ishi ndzụ unu.” ²⁶ Ọo ya bụ; ndu Danu wuru tugbua jeshia iphe, ẹphe eje. Mayika bya ahuma l'ẹphe ka iya ọkpehu; o kwe doo ghakọbe; ọ bụru iya ala unuphu.

²⁷ Tọbudu iya bụ; ẹphe gweta iphe ono, Mayika meshiru ono; duta onye ono, agwajeru iya iphe ono tugbua. Ẹphe jeshia Layishi je etsoo ndu ono, bukpọepho lẹ nchi odo; tūsarū ẹhu ono ọgu. Ẹphe gude ọgu-echi gbua pẹ pyaapya; woru ọku tufu lẹ mkpukpu ono.

²⁸ Ọphu ọ tọ dudu onye byaru adzota pẹ nụ; kele ẹphe bu ndu Sayidonu ụzenya; tẹme ọphu ọ dudu iphe, ẹphe lẹ ndu ọzo emegbajẹ.

Èka mkpụkpu ono, bụ Layishi nọ bẹ bụ lẹ nsuda úbvú, nọ-kube mkpụkpu Betu-Rehobu. Ndu Danu woru mkpụkpu ono kpụkwaa; buru. ²⁹ Èphe gube mkpụkpu ono Danu, bụ iya bụ èpha nna phẹ oche, bụ onye ono a nwuru Ízurelu. Òle iphe, mkpụkpu ono shi aza bẹ bụ Layishi. ³⁰ Òo l'èka ono bẹ ndu Danu doberu ntẹkpe ono, a kpuru akpụkpu ono. Ò bụru Jionatanu nwa Geshomu; mbụ nwanwa Manáse waa unwu iya bẹ bụ ndu gwaaharu ndu ipfu Danu iphe gbiriri jasụ teke a byaru akpua ndu alì ono lẹ ndzụ. ³¹ G'ulo Chileke nọ-bekporu lẹ Shilo bẹ èphe gwakọtaerupho ntẹkpe Mayika ono; mbụ ntẹkpe ono a pyiru apyipyi ono.

19

Onye Lívayi yẹe nwanyi, ọ tọ ludu ọkpobe alulu

¹ Teke ndu Ízurelu te enwedu onye eze bẹ ọ dūru nwoke lanu, bụ onye Lívayi, bu l'imime alì úbvú úbvú ndu Ifuremu. Ò duta nwanyi, ọ tọ ludu ọkpobe alulu lẹ mkpụkpu Bětulehemu, nọ l'alì Jiuda. ² Òle nwamgbọko ono wataru agba ukpara; bya alufu lashia ibe nna iya lẹ Bětulehemu, nọ l'alì Jiuda. Ò nọchaepho onwa eno l'ibe nna iya ono; ³ ji iya gbeshi jeshia ya arworwo g'ọ lwa azu. Ò gbeshi kputa nkafu-igara labo; duta nwozi iya èphe swiru jeshia. Èphe rwua; nwamgbọko ono duta iya; èphe bahụ l'ulo nna iya ono. Nna nwamgbọko ono huma ẹ ya pho; bya egude ẹhu-utso gba iya ndzuta. ⁴ Ògo iya ono, bụ iya bụ nna

nwamgboko ono sede iya; yee ya noo ujiku eto. O nodu l'eka ono eri; angu bya ekujekwapho mgbenya l'eka ono. ⁵ Tobudu iya bu; o be le mboku k'eno; ephe tehu l'onmewa utsu; o kwakobe g'o lashia; nna nwamgboko ono su ogo iya ono: "Ria nri g'ehu shihu ngu ike teme l'ilashijewaro."

⁶ Oo ya bu; ephebebo tuko nodukota ria; ngua. E mecha; nna nwamgboko ono su iya: "Jiko nodufunaa l'enyashi-a; mee g'ehu tsofua ngu utso."

⁷ Nwoke ono bya agbeshi ge ya lashia; ogo iya ono rwopyabe iya; k'ophu bu l'o kwafuaru akwakwa l'enyashi mboku ono. ⁸ O bya erwua l'utsu mboku, kwe iya ujiku ise; o gbeshi le ya alawa; nna nwamgboko ono sukwa iya: "Ria iphe g'ehu du ngu gbukuu; g'inodu teke o beru l'eswe l'ilashiwaro." Oo ya bu; ephebebo bya atuko nodu; rigba nri.

⁹ Tobudu iya bu; o be teke nwoke ono; yee nyee ya ono; me nwozi iya pho gbeshiru g'ephe lashia; ogo iya ono, bu iya bu nna nwamgboko ono su iya: "Lenu; nta-a be o buakwaa uzenyashi; jiko kwafua akwakwa l'enyashi-a. Mbua-a; lenu le nchi ejihuakwa. Nodukwa; kwaa akwakwa l'enyashi-a g'ehu tsoo ngu utso. Teke o beru l'onmewa utsu echele; igbeshi lashia unuphu ibe ngu."

¹⁰ Obenu le nwoke ono be o to duedu g'o kwabaa akwakwa ozo. O gbeshi tugbu; o buru iya alala. O duta nyee ya ono; kputa nkafu-igara labo ono, o bochaaru ivu; o buru phe atugbu kwaseru uzo mkpukpu Jiebusu, bu

iya bu Jierúsalemu. ¹¹ Ẹphe nọduepho Jiebusu ntse; nchi nọdu ejihugbuwa. Nwozi ono pfiaru nnajiuphu iya ono sụ iya: “Jiko bya g'anyi bahụ lẹ mkpụkpu ndu Jiebusu je akwaa l'enyashi-a.”

¹² Nnajiuphu iya ono sụ iya: “Waawaa; anyi taa bahụdu mkpụkpu ndu ọhozo, ta abụdu ndu Ízurelu. Anyi e-jechia jerwua mkpụkpu Gibiya.” ¹³ Sụ iya: “Bya g'anyi kukebe ẹhu jerwua mkpụkpu Gibiya; ọzoo mkpụkpu Rama g'anyi akwaa l'ẹka lanụ l'ẹka ono.” ¹⁴ Ọo ya bụ; ẹphe tugbukwa; nchi jipfu pẹ lẹ g'ẹphe erwuwaa mkpụkpu Gibiya, nọ l'alị Benjiaminu. ¹⁵ Ẹphe rwua; bya aswiba; bahụ lẹ mkpụkpu Gibiya g'ẹphe kwaa l'ẹka ono. Ẹphe je anọdu l'edupfu mkpụkpu ono; kele ọ tọ dudu onye dutaru pẹ nụ g'ẹphe bahụ ibe iya je akwaa.

¹⁶ No iya; a bya ele ẹnya; nwoke ọgerenya shi-waa l'ozì ẹgu eje alwa l'uzenyashi ono. Nwoke ono bẹ bụ onye shi l'alị úbvú úbvú ndu Ifuremu. O bu ebubu lẹ Gibiya. Ndu bu l'ẹka ono bẹ bụ ndu Benjiaminu bẹ ẹphe bụ. ¹⁷ Nwoke ọgerenya ono bya apalia ẹnya hụma onye ije, nọ l'edupfu ono; ọ jia ya; sụ: “?Bụ awe bẹ iije? Teme ?bụ aweya bẹ i shi?”

¹⁸ Ọ sụ iya: “Anyi shikwa Bẹtulehemu, nọ l'alị Jiuda eje ala l'imime alị úbvú úbvú ndu Ifuremu. Ọo l'ẹka ono bẹ mu bu. Mu shi je Bẹtulehemu; mu nọdu alawa l'ulo Chipfu; ọphu ọ dudu onye dutaru mu duba l'ibe iya. ¹⁹ Anyi gudekwaru nkapfu-igara anyi ẹswa ọkponku, ẹphe a-zẹ azẹ; waa nri, ẹphe e-ri; bya egudekwapho nri waa mẹe k'anyibe ndu-ozì ngu; mbụ kẹ mbedua;

waa kẹ nwozi ngu kẹ nwanyi; mẹ kẹ nwokoro-a, anyi l'iya tuko swiru-a. O tọ dukwa iphe, ọko iya duru anyi.”

²⁰ Oo ya bu; nwoke ogerenya ono; su phe: “G’ehu dukwa unu guu. Unu hakporo ẹka; mu e-meeru unu iphe, mkpa iya duru unu. Unu be jekwa k’aze l’edupfu.” ²¹ No iya; o duta phe; lashia ibe iya. O bya anukota nkapfu-igara nwoke ono nri. Epe bya akwoebechaa okpa; bya eria; ngua.

²² Epe nodukwadu-a eme emereme; ndu iwashi shi le mkpukpu ono bya agbaa ulo ono, epe no ono mgburugburu. Epe bya etsuaha ẹka le mgbo; epfuru nwoke ogerenya, nwe ulo ono asuje: “Dufutaru anyi nwoke ono, bataru l’ulo ngu ono g’anyi jepfu!”

²³ Onye ono, nwe ulo ono bya ekpufu etezi je asu phe: “Ndu mu; waawakwa! Unu te eweshinu iwashi. Unu te emeshinu egube iphe-iphere owana; eshinu nwoke-a bu ibe mu be o byaru.

²⁴ Waa nwa mu nwanyi, nwoke teke ejepfuswee baa; wakwapho nwanyi, nwoke ono ta aludu okpobe alulu. Mu e-dufuta phe nta-a g’unu gude phe jepfu; mee phe egube dukpoepho unu ree. Ole-a; unu te ejekwa eme nwoke-a egube iphe-iphere du nno.” ²⁵ Ole ndu ono ta ngaduru iya nchi. Oo ya bu; nwoke ono, byaru ebyaa ono bya edufuta nwanyi ono, o tọ ludu okpobe alulu ono l’etezi; nu phe. Epe gude iya phakota iya l’enyashi ono mgburugburu. Nchi bohujeeppo; epe paru iya haa; g’o tughua.

²⁶ Nchi bohushia; nwanyi ono kpota onwiya je adaa gburugudugungu l’onu mgbo ulo nwoke

ono, nnajiuphu iya nọ ono. O dabyiru l'eka ono gbiriri jeye nchi bọhu. ²⁷ Nnajiuphu nwanyi ono bya etehu l'utsu; gūhaa ụzo gę ya lufu lashi; nwanyi ono o tọ ludu okpobe alulu ono dabyiwaru l'onulo ono; wushi eka l'onu-abata. ²⁸ O sụ iya: "Gbeshi g'anyi la!" O buru rigbidii. O kwe bya apata iya tu-kobe l'eli nkafu-igara iya; o buru iya ala unuphu. ²⁹ O larwua unuphu bya ewota mma gbubushia nwanyi ono, o tọ ludu okpobe alulu ono le nkwo le nkwo. Kwakashia ụzo iri l'ebo; chita je ekeeru ndu Izurelu l'ipfu l'ipfu. ³⁰ Onyemonye humaru iya nu; nodu asuje: "Egube iya owa be enya ta ahumajekwaru l'ali Izurelu; ophu e te mejekwaru egube iya owa e shikpoo teke ndu Izurelu shi l'ali Ijiputu lufuta gbiriri byasu ntanu-a. Unu rikwaa ya oriri; unu achiaru iya idzu; pfua iphe, anyi e-me."

20

Ndu Izurelu akwakobe etso ndu Benjaminu ogu

¹ Tobudu iya bu; ndu Izurelu l'ophu bya azafutakota e shi le mkpukpu Danu jeye le mkpukpu Biye-Sheba; mbu jeye l'ali Giladu. Ikpoto oha ono bya edzukobe g'onye lanu l'iphu Chipfu le mkpukpu Mizupa. ² Ndu-ishi Izurelu l'ipfu l'ipfu l'ali Izurelu l'ophu bya edzukota l'iphu ndu ke Chileke, dzukoberu nu ono. Iphe, ndu ojogu phe, gude okpa; bya apagbaaru oguechi du be bu unu ugbo unu labo l'unu ukporo

iri. ³ Ndu Benjaminu bya anuma ọ ndu Ízurelu bẹ jerwuwaru mkpukpu Mizupa. Tọbudu iya bu; ndu Ízurelu bya asu: “Unu kọkpeeduru anyi g'ejo-iphe ọwana shikpoo nwua.” ⁴ No iya; onye Lívayi ono, bu iya bẹ alu nwanyi ono, e gburu ono bya akọahaa ya su: “Mu ọ nyee mu bẹ bahuru ọ mkpukpu Gibiya, nọ l'alị Benjaminu g'anyi je akwaa akwakwa. ⁵ O be l'enyashi; unwoke ndu Gibiya byapfutashia mu; bya agbaa ọlo, mu nọ mgburugburu. Ọphe nọdu eme g'ẹphe gbua mu. O bu ru nyee mu bẹ ẹphe guderu k'ẹhuka jepfu jasụ o nwuhu. ⁶ Tọbudu iya bu; mu pata nyee mu ono gbubushia; chita iya wojechaa l'alị Ízurelu mgburugburu; kele ẹphe rwuru alị; bya emee ẹbyi l'alị Ízurelu. ⁷ Nta-a; unubẹ ndu Ízurelu l'ophu; unu pfua g'ee-me iya.”

⁸ No iya; ndu Ízurelu wulihukota g'onye lanu; su: “O tọ dukwa m'onye lanu l'ime anyi byaru a-la unuphu. Mbụ l'ọ tọ dudu m'onye byaru a-la ibe iya. ⁹ O le nta-a bẹ iphe, anyi e-me ndu Gibiya ta adukwa abudu g'anyi tya ido; ẹgube ido ono meru bẹ bu g'anyi e-me phe. ¹⁰ L'okpa-ipfu Ízurelu l'ophu bẹ e-wofuta umadzu iri l'ime ndu ophu du ukporo ise; a hota umadzu ukporo ise l'ime ndu ophu du unu labo l'ukporo iri; a bya ahota unu umadzu labo l'ukporo iri l'ime unu ukporo l'ise g'ẹphe buru ndu a-nodu evujeru ndu ojogu nri. Oo ya bukwanu ẹphe -jerwua mkpukpu Gibiya, nọ l'alị Benjaminu; ẹphe emee phe iphe, gbaru phe nu ọ k'ẹbyi ono, ẹphe meru l'alị Ízurelu ono.” ¹¹ Oo ya bu; ndu Ízurelu

l'ophu bya edzukòbekota g'onye lanu g'èphe tsoo mkpukpu ono ogu.

¹² No iya; okpa-ipfu ndu Ízurelu bya ezia unwoke; èphe jegbabe ipfu Benjiaminu su phe: “?Èbyi owana, e meru l'echilabo unu-a bukpoogunu? ¹³ Unu dufutaru anyi ndu iwashi ono nta-a; mbu ndu Gibiya ono g'anyi gbushia; g'anyi shi nno wofu ejo-ìphe ono l'alì Ízurelu.” O le ndu Benjiaminu ta ngaduru nchi l'ìphe ono, unwunna phe, bu ndu Ízurelu pfuru phe ono. ¹⁴ O bu iphe, ndu Benjiaminu meru bu l'èphe jeru edzukobe le mkpukpu Gibiya g'èphe tsoo ndu Ízurelu ogu. ¹⁵ Èphe bya edzukobe ukporo unu nemadzu eto l'unu ise, bukota ndu pagbaa ogu-echi, bu ndu shikota le mkpukpu ke ndu Benjiaminu; teme waa unu nemadzu l'umadzu ukporo iri l'ise, bu ndu e shi le mkpukpu Gibiya hota. ¹⁶ L'ime ndu ojogu ono g'èphe ha be unu l'ukporo iri l'ise bu ndu a hotaru, emegbaa ekicha. Èphe bu ndu maru g'agba mgbeka l'ehu l'ehu; k'ophu bu l'èphe a-du ike gude mkpuma gbata akpuru egbushi lanu; ophu èphe agbaswedu iya agbaswe. ¹⁷ Ndu Ízurelu; a - gufukwa ndu Benjiaminu; bya edzukobe unu unwoke ugbo unu labo l'unu ukporo iri, bu ndu pagbaa ogu-echi. G'èphe ha bukota ndu alwuje ogu.

Ndu Ízurelu etso ndu Benjiaminu ogu

¹⁸ Oo ya bu; ndu Ízurelu bya awu-lihu jeshia mkpukpu Betelu; je ajitaada Chileke; su: “?Bu

ndu ole l'ime anyi bẹ e-vuru ụzo je etsoo ndu Benjaminu oḡu?"

Chipfu sụ phẹ: "Ọo ndu Jiuda bẹ e-vuru ụzo je."

¹⁹ Tọbudu iya bụ; o be l'ụtsu iya; ndu Ízureḷu wụ-lihu je adọru kwabẹru mkpụkpu Gibiya.

²⁰ Ndu Ízureḷu bya awụfu jeshia etso ndu Benjaminu oḡu. Ẹphe woru onwophe dozichaa g'ẹphe a-nọdu tsoo phẹ oḡu ono lẹ mkpụkpu Gibiya. ²¹ Ndu Benjaminu bya eshi lẹ mkpụkpu

Gibiya wụfuta bya egbua ndu Ízureḷu ụkporo unu ụmadzu labọ l'unu iri l'ise lẹ mbọku ono.

²² Ole ndu Ízureḷu bẹ byaru eyeeru nwibe phẹ njima; bya edozichaa onwophe k'ọḡu l'ẹka ono, ẹphe shi nọdugbaa lẹ mbọku k'ivuzọ ono. ²³ No

iya; ndu Ízureḷu bya awụfu je araa ẹkwa l'iphu Chipfu gbiriri jasụ l'ụzenyashi. Ẹphe jikwaapho Chipfu sụ iya: "Bụ g'anyi je etsobaa unwunna anyi, bụ ndu Benjaminu oḡu ọzo tọo?"

Chipfu sụ phẹ: "Unu jenu."

²⁴ Tọbudu iya bụ; o be lẹ mbọku k'ẹbo; ndu Ízureḷu wụfutakwa bya g'ẹphe tsoo ndu Benjaminu oḡu. ²⁵ Lẹ mbọku k'ẹbo iya ono bẹ ndu Benjaminu byaru eshikwaphọ lẹ Gibiya

wụfuta je etsoo ndu Ízureḷu oḡu. Ẹphe gbua ndu Ízureḷu ụkporo unu ụmadzu labọ l'unu ise, bụkota ndu pagbaa oḡu-echi. ²⁶ Tọbudu iya

bụ; ndu Ízureḷu l'ophu wụfu jeshia Bẹtelu je anọdu kwaa ẹkwa l'iphu Chipfu. Ẹphe swikota ẹḡu mbọku ono jasụ l'ụzenyashi. Ẹphe bya

egweeru Chipfu ngweja-akpo-oku waa ngweja-
 ẹhu-guu. ²⁷ Oo ya bu; ndu Ízurelu bya ajita
 Chipfu; kele teke ono be bu l'eka ono be okpoko
 ogbandzu Chileke shi nodu. ²⁸ O buru Finehasu
 nwa Eleyaza; mbu nwanwa Eronu be bu onye
 eleta iya enya. Epe jia Chipfu su iya: “?Bu
 g'anyi je je etsoo ndu Benjaminu, bu unwunna
 anyi ogo ozo; to g'anyi te ejeshi?”

Chipfu su phe: “Unu je; kele echele be mu e-
 woru phe ye unu l'eka.”

Ndu Ízurelu alwu ndu Benjaminu

²⁹ Tobudu iya bu; ndu Ízurelu bya eye ndu ne-
 madzu; epe kpukotaru ekpuru gbaa mkpukpu
 Gibiya mgburugburu. ³⁰ Ndu Ízurelu bya awufu
 jepfushia ndu Benjaminu ogo le mboku k'eto
 ono. Epe je edozichaa onwophe egube ono,
 epe emejehawa iya ono nodu kwaberu ndu
 Gibiya. ³¹ No iya; ndu Benjaminu wufuta g'epe
 bapfu ndu Ízurelu. Ndu Ízurelu defuta phe
 edefuta. Epe shi le mkpukpu phe ono wufuta.
 Epe bya awata egbushi ndu Ízurelu egube ono,
 epe egbujehawaa phe ono; k'ophu bu le ndu
 Ízurelu, epe gbushiru l'egu; me le gbororo uzo,
 e shi eje Betelu; me ophu e shi eje Gibiya be
 du ukporo umadzu l'umadzu iri. ³² Tobudu
 iya bu; ndu Benjaminu nodu epfu su: “Anyi
 egbushiakwa phe egube anyi gbushiru phe le
 k'ivuzo pho!”

Ndu Ízurelu nodu epfu su: “Unu g'anyi kpola
 azu g'epe wufuta-gbua le mkpukpu; bya
 anodukota le gbororo.” ³³ No iya; ndu Ízurelu

l'ophu lufukota l'eka ephe no; je akwakachaa k'ogu le mkpukpu Belu-Tama. Ndu Izurelu, bu ndu ophu kpugbaaru ekpuru l'egbudu shichaa l'eka ephe no zefuta l'uzo enyanwu-ariba mkpukpu Gibiya. ³⁴ Tobudu iya bu; ukporo unu nemadzu l'unu umadzu ise, a hotaru l'ime ndu Izurelu l'ophu bya awufu jeshia etso ndu Gibiya ogu. Ogu ono kpohu oku; k'ophu bu le ndu Benjaminu ta amadu le teke ephe a-buru mkpurupyata be rwuwaru nu. ³⁵ Chipfu gude ndu Izurelu l'wua ndu Benjaminu mboku ono. Ndu Izurelu gbua ndu Benjaminu ono ukporo unu nemadzu eto l'unu labo l'ukporo umadzu iri l'ise, bu ndu pagbaa ogu-echi. ³⁶ Oo ya bu; ndu Benjaminu huma l'a l'wukpewaru phe.

Ndu Izurelu paru ndu Benjaminu haa la-phushia azu; kele ephe kporo obu ye le ndu k'ono, ephe yeru ephe kwakaa l'egbudu le mgboru mkpukpu Gibiya ono. ³⁷ No iya; ndu ono, domishiru onwophe l'egbudu ono gbaepho egwegwa bapfu ndu Gibiya; bya agbakashihu gude ogu-echi gbushikota ndu bu le mkpukpu ono l'ophu. ³⁸ Ndu Izurelu be ephe le ndu ono, domishiru onwophe l'egbudu ono chihawaru iya achichi l'ephe e-me g'enwuru-oku kpufu le mkpukpu ono. ³⁹ Oo ya bu; teke ono ndu Izurelu ghakoberu tsu-phuahaa azu l'ogu ono; ndu Benjaminu wata egbushi ndu Izurelu; gbua phe ukporo umadzu l'umadzu iri pho; be ndu Benjaminu wataru epfupfu asuje: "Anyi alwukwaa phe egube anyi lwuru phe le mboku k'ivuzo

pho!” ⁴⁰ Ẹnwuru ọku kpufuepho lẹ mkpukpu ono; ndu Benjaminu bya aghaa ẹnya hụma lẹ mkpukpu phẹ ono l'ophu bẹ ẹnwuru-ọku, shi iya nụ akpụ kẹ tụtutuutu ala l'akpaminigwe.

⁴¹ Tọbodu iya bụ; ndu Ízurelụ ghakọbe wụpyabe phẹ. Ndzụ-agugu rwuta ndu Benjaminu; kele ẹphe mawaru lẹ teke ẹphe a-buru mkpurupyata bẹ rwuwaru nụ. ⁴² Ọo ya bụ; ẹphe chie ọkpa l'oso gbalaaharu ndu Ízurelụ; agba ala l'uzo echięgu. Ọle ẹphe ta awaduru l'ọgu ono. Ndu Ízurelụ ndu ọphu shi lẹ mkpukpu ono awufuta bẹ kwabutaru phẹ woru phẹ gbushia l'ẹka ono. ⁴³ Ẹphe gbaa ndu Benjaminu mgburugburu; chia phẹ je agbabua phẹ iphu; zọo phẹ pyakapyaka gbiriri jasụ l'uzo ẹnyanwu-awawa mkpukpu Gibiya. ⁴⁴ Ndu Benjaminu, e gburu egbugbu bẹ dụ ụkporo unu nemadzu labọ l'unu ise, bụkota ndu ojọgu, ike dụ l'ọgu. ⁴⁵ Ẹphe ghakọbe gbaru lashia l'echięgu l'oke mkpuma Rimonu. Ndu Ízurelụ gbutsukwaapho unu ụmadzu iri l'ẹbo l'ụkporo ụmadzu iri lẹ gbororo. Ẹphe chia ndu Benjaminu kpabekpabe jasụ lẹ mkpukpu Gidomu; bya egbutsushifua unu ụmadzu ise ọzo. ⁴⁶ Mbọku ono bẹ ndu Benjaminu, e gburu egbugbu, bụ iya bụ ndu pagbaa ogu-echi bẹ dụ ụkporo unu nemadzu ẹto l'unu ụmadzu labọ l'ụkporo ụmadzu iri. G'ẹphe hakọta bẹ bụgbaa ndu ike dụ l'ọgu.

⁴⁷ Ọle unu nemadzu l'ụkporo ụmadzu iri bẹ duru ike nahụ gbarwua echięgu oke mkpuma, Rimonu. Ẹphe nọkota l'ẹka ono ọnwa ẹno mgburugburu. ⁴⁸ No iya; ndu Ízurelụ bya alaphu

azu; bapfu ndu Benjaminu; je egude ogu-echi tuko ndu bu le mkpukpu ono gbushikota; mbu gbukota iphe-edobe; mekpoo iphemiphe, ephe humaru. Iphe, bukpoo mkpukpu, ephe jepfuru be ephe tushichaaru oku.

21

Unwanyi, ndu Benjaminu a-luru

¹ Ndu Izurelu be ribuhawaru angu le mkpukpu Mizupa su lo to dudu m'onye lanu l'ime phe byaru ekuta nwada iya kee onye Benjaminu.

² Oo ya bu; ndu Izurelu ono zafu je akuru le Betelu; nodu l'iphu Chileke kwaa ekwa kwashia ya ike; gbiriri jasu l'uzenyashi. ³ Ephe nodu ara su: "Oowaa! Gube Chipfu, bu Chileke ke ndu Izurelu; ?bu gunu kparu iphe, egube iphe owana dapfutaru ndu Izurelu? ?Bu gunu kparu iphe, ipfu lanu a-nodu achihu achihu le Izurelu ntanu?"

⁴ O beepho lonmewa utsu le nchitabohu iya; ephe woru oru-ngweja kpa l'eka ono; bya egwee ngweja-akpo-oku; waa ngweja-ehu-guu l'eli iya. ⁵ No iya; ndu Izurelu bya ajia su: "?Bu ndu ole l'ipfu ndu Izurelu l'opfu be te etsodu bya g'anyi dzukoo l'iphu Chipfu l'eka-a?" Noo kele ephe ribuhawaru oke nte su l'onye ta abyaduru g'ephe dzukobe l'iphu Chipfu le mkpukpu Mizupa be e-gbu egbugbu. ⁶ Tobudu iya bu; aphu rwua ndu Izurelu l'ehu l'opfu unwunna phe ono, bu ndu Benjaminu. Ephe su: "Nta-a be ipfu lanu chihuru le Izurelu."

⁷ Sụ: “?Denukpoo g'anyi e-me lushiaru ndu ophu phoduru nụ nwanyi; eshinu anyi gudewaa epha Chipfu ribua nte l'ọ tọ dudu nwada anyi, anyi byaru eke phe-a.”

⁸ Oo ya bu epe bya aja sụ: “?Bunu-a ndu ole l'ipfu ndu Ízurelu be ta abyaduru g'anyi dzukobe l'iphu Chipfu le mkpukpu Mizupa?” No iya; epe bya amaru le ndu mkpukpu Jiabeshi-Giladu be ta adudu m'onye lanu, byaru nu; ⁹ noo kele epe byaru edzua onwophe maru l'ọ tọ dudu ndu Jiabeshi-Giladu m'onye lanu no l'eka ono. ¹⁰ Todbudu iya bu; ndu ono, dzukoberu l'eka ono bya eye ukporo unu ndu ojogu l'unu ndu ojogu iri g'epe je egude ogu-echi gbushikota ndu bu le Jiabeshi-Giladu; je akpachaa l'unwanyi; me unwegirima. ¹¹ Epe su phe: “Iphe, unu ee-me baa: Unu gbushia iphe, bukpoo unwoke; me unwanyi, nwoke jepfujewaru.” ¹² L'ime ndu ono, bu le Jiabeshi-Giladu ono be bu unu unwumgboko be epe humaru, bu ndu nwoke teke ejepfuswee. Epe duta phe jeshia l'odu phe le mkpukpu Shilo l'ali Kénanu.

¹³ Todbudu iya bu; ndu ono, dzukoberu nu ono l'ophu bya ezia ozi g'e je ezia ndu Benjiaminu ono, no l'oke mkpuma Rimonu l'epe l'epe be duwaa le ree. ¹⁴ Oo ya bu; ndu Benjiaminu lwatashia le teke ono; a bya eduru unwumgboko ono, a haru epe nodu ndu, bu ndu shi Jiabeshi-Giladu pho nu phe g'epe luru; obenu l'unwumgboko ono ta asudu phe.

¹⁵ No iya; aphu ndu Benjiaminu bya erwua phe l'ehu; kele Chipfu yewaru uwara l'ipfu ndu

Ízurelu.

¹⁶ Tòbudu iya bu; ndu bu ọgerenya lẹ ndu ono, dzukọberu nù ono bya asù: “?Denu g’anyi e-me k’unwanyị, ndu ọp̄hu phọduru nù a-luru; g’a tukurawu unwanyị, nọ l’alì ndu Benjaminu gbushigbua?” ¹⁷ Ẹp̄he sù: “Ọ tọ dukwa g’ee-me gẹ ndu Benjaminu, phọduru nù te enweru okiphe; k’ọp̄hu bukwanu l’ip̄fu lanù ta a-chìhudu lẹ Ízurelu.” ¹⁸ Sù: “Ọle anyi te e-kekwanù phẹ unwada anyi; eshinu anyibe ndu Ízurelu ribuwari nte sù: ‘Onye keru ndu Benjaminu nwada iya; g’onye ọbu bukwaru onye a turu ọnu!’ ”

¹⁹ Ẹp̄he sù: “Lenu! Anyi nwekwaru ọbo-ipe, anyi abọjeru Chipfu l’aphagapha lẹ Shilo, nọ l’uzo isheli mkpukpu Betelu; mbu l’uzo enyanwu-awawa uzo, shiru Betelu jeshia mkpukpu Shekemu; waa l’uzo ndohali mkpukpu Lebona.” ²⁰ Ọo ya bu; ep̄he p̄fuaru ndu Benjaminu sù phẹ: “Unu tugbua je edomishia onwunu l’op̄fu-vayinu; ²¹ kwagebekp̄oep̄ho. Teke unwumgboko Shilo wufutaerup̄ho bya ete ebvu; g’onyenonu gbafutachaa l’op̄fu-vayinu ono je egude nwamgboko lanù, ọo-luru; gude gbaru lashia alì ndu Benjaminu. ²² Teke ndu nna unwumgboko ono; ọzoo unwune phẹ unwoke jeru ep̄fufu bẹ anyi a-sù phẹ g’ep̄he meeruro anyi ree; yetaru unu ẹka; kele ọ tọ dudu nwoke, anyi gbuphodu nwanji, ọo-luru lẹ teke anyi lwuru ọgu ono. L’iswi dukwa phẹ mma; eshinu ọ tọ budu ep̄hebedua kutaru unwada phẹ kee unu.”

²³ Oo ya bu; ndu Benjaminu mee nno. O be teke unwumboko ono ete ebvu; nwoke nonu gbafutachaa je azu-gude nwamgboko lanu; pata iya gbalaa g'o je a buru nyee ya. No iya; ephe lashia l'oke ali phe; je eworu mkpukpu ono kpukwa-zia; buru. ²⁴ Tobudu iya bu; ndu Izurelu wukahu l'eka ono teke ono; onyenonu lashia unuphu l'ipfu nkiya; mbu onyenonu shi l'eka ono lashia l'oke ali nkiya.

²⁵ Teke ono be ndu Izurelu eshidu nweru onye bu eze phe; onyemonye shi anoduje eme g'o du iya.

Bayiburu Izii
Izii: Bayiburu Izii Bible

copyright © 2014 Wycliffe Bible Translators, Inc.

Language: (Izii)

Contributor: Wycliffe Bible Translators, Inc.

All rights reserved.

2020-11-18

PDF generated using Haiola and XeLaTeX on 21 Feb 2024 from source
files dated 29 Jan 2022

c6885c7c-c550-5b8b-a4fe-4bd714af4f6d